

松陽縣志

第陸冊  
卷九  
人物

松陽縣志卷九

人物志

理學  
文學

忠義  
尚義

廉正  
隱逸

經濟  
藝術

孝友  
流寓

篤行  
方外

山川秀靈鍾毓人物必有卓越之觀松雖僻在一隅自歷代以來名臣理學忠孝廉正光昭史策者類有其人至若文章傳為膾炙德義著於鄉閭山林隱跡足推高尚之風道術濟人均屬超凡之品風化所繫涉筆尤兢兢乎慎之後之覽者能無感發而興起焉志人物

人物志一

理學

宋

松陽縣志

卷九 人物

理學

一

葉夢得字少蘊宋紹聖丁丑進士自丹徒尉任婺州教授歷官翰林學士知蔡州民有翟氏者家產百餘萬兄弟七人其季別居父死後兄賂官吏不以爲弟季訴於官五年不得直夢得呼而語之曰汝嘗娶乎曰娶信陽鄭氏女誰爲婚曰父主之徵其婚書則父親筆出示其兄乃服析其產爲七又西平民訟有子爲盜誤繫殺之者法當勿論夢得驗所繫傷痕不一曰夜繫盜不知其爲子一繫遽死可矣安有屢繫不逃復不能辨者捕劾之乃父嬖後妻殺前妻之子給以爲盜夢得曰此廢人倫矣以故殺子孫罪坐之由是政聲大振再召入翰林學

士遷尚書左丞以崇慶軍節度使致仕夢得天姿粹雅  
文詞幹略恆不在人下平生歷仕皆以稱職聞自號石  
林山人所著有易傳書傳春秋傳春秋考春秋讞論語  
釋言孟子通議石林避暑金石類考等行於世

潘景憲字叔度以童子中禮部選入太學一時學官如王  
十朋輩咸器重焉與呂伯恭同擢進士以己學不及伯  
恭遂師事之因與朱子友善申以婚姻之好會朱子江  
西使事入對作書告曰甚願一見以慰索離然子今日  
之行名爲召客是以不果及以口語罷歸又書告曰子  
今幾過七里灘矣朱媿不能答及卒朱子爲撰祭文墓

松陽縣志

卷九

人物

理學

二

銘謂其躬行之効內則孝弟著於家外則仁義信於友  
而竟不能隨世俯仰一日致身於仕路云

項安世字平甫七歲能賦詩長治春秋教授紹興時朱文  
公爲浙東提舉乃相與講明義理之學後文公在經筵  
薦人爲諫官召試館職除秘書省正字嘗上疏曰陛下  
仁足以覆天下而不能施愛於宮闈量足以容羣臣而  
不能隱忍於父子上不聽已而聞旨召姜特立赴闕復  
上疏曰小人在側譬養盜賊於室中禁防一綏爲禍不  
測乞早寢召命在朝建明多類此累官龍圖閣慶元初

坐黨籍罷

王光祖字文季官大理評事精於理學朱文公提舉時邂逅邑之福安僧舍文季拱立規掌如太極狀公卽異之曰王子胸中自有太極間以傳註質之文季曰公註中庸不使滋長於隱微之中愚意當加潛暗二字公深然之後數以詩文往復有寄孫竹湖書曰吾到栝止得士友王文季一人而已

項復字吉甫嘗從慈湖楊先生學一日先生問曰學而時習作如何說吉甫倉卒無以對但云不談口生荆棘先生撫几歎曰正是此說吉甫繇是警悟學業益進晚年有薦於朝者以白衣授校書郎隱居不仕自號耕樂

松陽縣志

卷九

人物

理學

三

劉炎字子宣少侍父遯齋先生習聞庭訓專事程朱之學因慶元黨籍隱居不仕從真文忠遊著劉子邇言十二卷其畧曰中天地而立與天地參者人也天命以人不物之矣天不物之而自待以物始也人終去禽犢不遠矣然則人之性天地之性也孔以爲貴孟以爲善天地予人之正也荀卿謂之惡主血氣言之也楊雄謂之混雜人與物言之也韓愈品分之是猶以清濁之氣高下之質言之也荀韓楊之言性皆非天地予人之正也君子保天地之性之謂仁成天地之性之謂學其言行於世

王佐由鄉薦入太學尋補武學博士召試學士院對策言  
用兵起釁不便時韓侂胄欲籍此立功見策憤然諷御  
史胡紘劾佐狂妄出判潼川轉運司事佐涖官政善人  
賴休息常作利州學記謂聖人之道以修己治人爲要  
而世方以道爲僞以窮理明經爲儒而時方以儒爲黨  
是非出於一時公議定於萬世四川安撫使程松以爲  
譏訕朝政奏聞落職主管鴻禧觀歸之日單車就道篋  
惟衣冊而已

鄭克寬字伯厚居遂昌遊松陽類庠就項平甫得聞朱子  
之學淳熙乙卯以春秋中兩浙魁開禧乙丑試禮部延  
松陽縣志

卷九 人物

理學 四

對擢第二由進士授嚴陵郡博士積階至朝議大夫嘗  
歷荆襄間多著作皆渾然天成枯守高夢月稱其有舒  
向之學而不得一造經緯有遷固之才而不得一入史  
館有燕許之筆而不得一侍宮廷官不稱能位不酬德  
惜哉

王道深隱居力學究極性命之理朱晦庵見之與語大悅  
葉符叔亦嗜理學嘗請朱晦庵書敬齋箴以贈之大加  
敬異

元

王文煥一名子敬字叔恭少負雅操夙承家學以元末之

亂不屑仕進遂取孔孟諸儒緒言研極精微著道學發明大學發明中庸孟子解及心鏡圖治心銘諸作以心爲明鏡毋自欺爲藥物畏敬恐懼克復省察爲工夫巍然負泰山北斗之望學者宗之稱爲西山先生

明

毛仲字時正學有原委好闢異端尤精圖學嘗誦節孝徐先生三善之言以自砥礪篤志孝友以賓貢授海陽令仗忠信敦教化吏民不忍欺然素性耿介當道不合甫期月遂謝事歸所著有常道異端論及理數啟鑰  
以上十一人均附祀朱文公祠

松陽縣志

卷九

人物

理學

五

謹案府志謂葉夢得等均非栝產各引史傳附案辨証今查葉夢得係吳縣人潘景憲係金華人又如忠義門之葉夢鼎係甯海人誠如張序所云人物凡有名者輒附會牽引爲向來縣志之通病本應澈查刪汰以徵覈實無如舊志沿引已久至若葉夢得號石林今松陽三都桐溪莊有石林祠墓在焉其後裔繁盛代有聞人何竟數典忘祖以至於斯哉姑照舊志錄存以俟知者

清

劉可培字篤齋雅山人歲貢生生未期而父卒母氏撫以成立母卒枕塊柩旁至葬不離生平好二氏之學喜靜

坐觀心一日得夏靈峰書讀之有感卽總髮端委棄所  
學而學之篤志力行於心性理氣分合知行先後人心  
道心未發已發之辨以及朱陸之異同明清諸儒之得  
失禪學漢學西學之絕滅倫理皆能精思明辨發明清  
諸儒所未發而於古禮尤竭力提倡冠昏喪祭一遵儀  
禮少儀家禮甌海道尹黃慶瀾高其學行旌以敦品力  
學匾額卒年六十有二著有劉子遺書子三皆業儒長  
子以良尤能恪遵父訓父死哀經帶杖廬於墓側識者  
咸謂其克紹家學云

人物志二

忠義

宋

王仁孫字汝善辟入國學時相賈似道以母憂起復毅然率同舍生啟博士陳著詣闕上書切諫以似道罪惡昭彰愚夫愚婦亦思逐之今天奪其母是代陛下行罰也書上不報似道怒欲遠竄之以上不可乃止遂謝病歸家及宋社既屋乃慟哭震天以不能興復爲憾先儒程復深嘗稱爲忠義之士云

程塏字元爽樟四世孫調海門簿慷慨激烈每念世受國恩宋亡棄官歸自傷亡國之臣卽戴冠爲道士建太極陽明書院居之自稱神陽先生

葉夢鼎咸淳丁卯以夢鼎爲右相昔人云夢鼎先知贛州既辭大全之推挽及爲右相復辭似道之薦擢是有明哲保身之智也厥後召爲少師航海赴召以道梗不能進慟哭而還又有忠君殉國之心也

元

周明字思誠好義敢勇智力超羣性至孝元末山寇作亂明率鄉人勦捕盡擒之於是邑民俱獲以安故邑中長幼咸呼爲千戶居家不仕後聞元亡慟哭而逝

照府志  
補入

明

葉希賢號雪庵繇賢良爲南臺監察御史冰蘖自勵壬午六月靖難兵起家人驚潰相失謂其已死乃以衣冠發喪而葬希賢已從嗣君抵蜀隱姓名祝髮爲僧至重慶有杜景賢者遇之廼於地名松柏灘建觀音寺居焉朝夕誦經咒其徒聽之則易之乾卦也時或挾楚詞放舟於灘中流披卷哀誦每一葉訖卽投之水而哭有補鍋匠者往來慶里間或與對酌歌詩歌罷亦輒哭眾莫測其意雪庵終時年逾百與其徒訣曰我浙江松陽懷德里人也及啟遺篋止易本義及百將傳一帙耳隆慶萬

松陽縣志

卷九

人物

忠義

八

歷初再有恩旨卹錄以著其孤忠大節云

案據葉明經葆彝函述宣統庚戌赴都朝考遇四川茂州順明經士彬面述家世謂係雪庵後裔初雪庵從建文出亡西行之黔以隨從眾多招忌分遣人蜀在重慶之大竹善慶里築寺爲僧至正統年間建文迎入西內乃去寺僑居茂州改姓爲順置室家焉年逾百歲而終子孫蕃衍至士彬已數十傳云並云順係川頁二字頁與葉同音是爲改姓之原因姑附記於此以俟知者

項民彝字善恒狀貌修偉以明經授廣西監察御史上以皇太孫英明欲傳大寶乃抗疏諫曰父子相傳古今常

道陛下獨不聞衛輒之事乎且太子仁柔初無顯過千歲後將何以入宗廟乎上怒罷朝時天大雪民彞俯伏不起上入宮復取其疏讀之感悟命宦官搜於雪消陷處得之四肢已僵勅光祿寺調護尋以疾終上一日問侍臣曰何久不見長御史對曰已死矣歎息久之

盧璣字舜用家貧力學懷抱甚高天順甲申第進士廷策近萬言皆切中時弊李賢當國欲羅致之不屈遂上疏請正宮闈名分及闈寺引浮圖煽惑事言甚剴切執政外忌萬妃內短疏入不報未幾復抵權貴謫戍銅鼓汪直臨邊諷使見之許其入朝璣曰此膝不屈於人久矣

松陽縣志

卷九

人物

忠義

九

益勵志理學辨論古今未定之說作貞宇補遺十目其圖說深得聖賢之旨其雜論責宋舊臣遺士不應仕元與訂誣諸說俱出人意表孝宗時在東宮已聞其名卽位詔起已不可復作矣

詹嘉言字心聲少卓犖以忠義自許由賓薦授象山訓海寇洵警與邑令登陴共守屢出奇計佐令卒平寇因著墨守書及海外篇轉蒼溪諭入川闡擬元復失監試惜之薦撰蜀節孝錄王撫臺雅重之檄署梓潼篆公至未久流賊忽雨集城圯難守策令子瑗懷印同吏賫糧出間道賊至不屈誘逼之不爲動正辭詈賊六日斃於賊

刃梁司理行歛兩臺親奠合郡紳衿義請崇祀名宦復具疏題事聞贈國子助教喪歸松當事建祠於學之舊基所著書有柳西臺堅忠節錄

程必進字以序宋安節公後性至孝喪父雲衢哀瘠毀形思慕不已改號景雲優行篤學精於易著河圖衍義四方師焉崇禎拔貢授贛州訓兩臺重其才題授郡丞適大兵圍城未破子庠生矩勸作歸計必進怡然曰臨難毋苟免得與封疆俱亡幸矣令矩先回矩曰大人以忠報朝廷子以孝報生身毋爲矩慮城破父子俱死

以上舊志

徐仕堅明永樂間由府學拔貢人太學任南京應天府通

松陽縣志

卷九

人物

忠義

十

判理學淵邃博大昌明忠直鯁概孝心純篤歿後三年有司上聞奉勅封爲朝靖大夫以嘉其忠孝焉清雍正二年勅建忠義祠奉旨准入享祀  
以上十人入祀忠義祠

清

葉維藩字价人號辰生城西人道光壬辰舉人丁未進士以知縣分發湖南歷權桂陽黔陽篆宰黔陽時歲大饑藩議發常平粟賑之知府某有難色謂必報聞而後可藩曰待報則民已填溝壑矣請速發之獲嚴譴無悔也遂開倉發粟活饑民無算上官以是稱其能旋丁父憂

歸咸豐八年粵逆犯衢州藩出貲募團勇三月賊陷松  
乘勝襲郡城藩星夜馳赴省垣謁大吏乞師不獲藩泣  
曰處州地僻遠固不足爲浙重輕然無處州則金華危  
金華危則衢且不保百萬生靈忍膜視耶大府矍然許  
之時嵯使楊裕深司籌餉事意存委卸折之曰兵以餉  
濟若能儲餉何患無兵藩曰金衢之兵仰給於大庫獨  
處州必自籌餉何厚薄之不均耶楊語塞各憲司鑒其  
忠誠乃檄精兵數千進勦六月處州克復藩之力也十  
一年賊復犯衢州陷金華處州戒嚴知府李希郊聞藩  
知兵延至署與商戰守策藩曰禦寇必先扼險若坐守

松陽縣志

卷九

人物

忠義

十一

孤城危道也李頷之乃偕藩率勇至松之堰頭而賊已  
先一日陷遂昌撲松陽矣次日黎明賊至李督兵出戰  
爲所執藩遙望呼曰公自愛藩必不負公乃杖戈而進  
躬冒矢石團勇亦俱死戰俄而賊來益衆遂不支藩被  
擒賊誘之降叱曰殺則殺耳無多言與李知府同時遇  
害事聞奉 旨從優加贈道銜并給卹葬銀兩准入昭  
忠祠春秋報祀兼得襲蔭

潘灝原名慶瀾字鵬飛後稱爲烈士城南官塘舖人天資  
聰睿五歲能詩長治陽明學重交遊談及國事輒感慨  
歎歔至於涕泣歲丙午以金陵爲中原形勝地涉江而

西翼有所遇時大江上下青年愛國之士多往來奔走  
密合同志以圖變清政烈士聞而壯之遂從事焉是時  
清廷以安慶事搜捕餘黨烈士踉蹌趨海上執役於蘇  
滬鐵路藉儲工資浪跡江湖鬱鬱不得志戊申聞祖父  
訃哭奔回籍佐父治喪以山僻小縣無事可爲復赴杭  
任富陽警務辛亥武昌起義烈士投充黎都督部下前  
驅於九月六日拒北軍而同死於漢陽之戰場矣孔子  
曰殺身成仁烈士有焉奉諭專建忠烈祠馨香俎豆給  
家屬卹銀有加食報亦云厚矣

人物志三

廉正

宋

項宗嘉登紹興進士由考功郎轉將仕郎歷漕運至兵部侍郎居官仁慈立朝清介多所建明常賜緋衣所著有震谷集行世

何琮字宗玉初授吉州安福簿始至大書門屏曰俸薄儉自足官廉貧亦安入朝除左正言轉殿中侍御史先此臺諫駁爲宰相私人有彈劾先進副封琮獨守古法斥貪逐佞多合物論與相意忤改爲起居舍人一日諷琮

松陽縣志

卷九

人物

廉正

十三

駁陳埴除命答曰琮他日尙欲附善類相怒卽日左遷爲福建轉運副使相去召入爲戶部侍郎理宗嘗夢神人云天下欲太平何琮作宰相異日以語學士趙汝騰當國者忌之遂不果大用友人以詩悼之曰空形良弼夢只戴侍臣冠

潘大臨字舜舉嘗以兩浙運司主管文字官攝温州獲海寇五十閱其實釋無辜者半復以太府寺丞出權真州茶鹽時相丁大全使人之諷曰有羨獻卽受賞大臨曰吾一錢皆藉縣官羨餘何取大全怒馳代者夜半奪印去後知廣德軍

王唐珪字廷玉歲饑邑尹勸貸珪方卅角讀書於籍願以千石濟之眾異其志淳佑元年登進士親老歸養十年不仕丙寅授紹興法曹乙巳差尚書省簡閱官分守平江未幾攝監察御史廉察事適當輪對珪上封事言平天下之道正心誠意爲本守令不職實由宰輔奸邪罔上賈似道怒諷御史陳堅彈罷之

毛蘭字君玉資性冲澹莊重簡默事父母以孝撫孤嫠以恩官福州司李時宰相趙汝禠之黨曰林冕者有罪下獄使人夜懷金私之蘭正色不受復賄當道者以威怵之不動其人卒坐法汝禠聞而嘉曰蘭持法如此何有

於廷尉乎後召蘭不果行累官二十載歷政凡九考居最卒止承直郎未能脫選時咸以劉向此之

明

鄭德皎爲人風骨嶙峋不甚恭於士大夫識者大期曰此人他日爲諫官能正色直辭者未幾承詔擢兵科給事中侃侃疏章果如所期後論列忤旨遂廷杖落籍歸隱於邑之十里臨流賦詩以樂其志

劉性同潼川人因入府庠僑居麗水永樂西戍聯捷初宰同安補知廣濟行取貴州道監察御史終河南叅政歷官二十年所得惟俸金置田百畝以遺後清介大著

子鐸天順鄉薦廉介有乃父風

項華興由選貢入太學有才名授錦衣衛經歷居官清介  
讀書時與五雲周公南虞公瑤同窗相友善及公貢時  
周公任御史一日操江艘有樂指揮者失律將加軍令  
樂窘甚公保障之周意公得厚謝因私詢獲酬幾何答  
曰未嘗識荆周愕然曰我本介士爾更介於我也虞公  
爲都御史公往謁之見公冠帶破損執公手歎曰爾何  
廉介若此

以上  
舊志

清

高斐然字少梅光緒乙酉舉人署瑞安西安泰順象山縣

松陽縣志

卷九 人物

廉正

十五

學教諭陞杭州府學訓導時當清季士習浮夸下車講  
學卽以忠孝友悌諄諄勸勉蓋由其平日孝友實行以  
身作則故士人皆化之歷官數載兩袖清風每至一邑  
僅携一僕徒步單車門生除束脩外凡有私餽概卻不  
受人皆以廉儉稱之生平持家友愛教諸弟讀書每至  
夜分或徹宵有偷兒伺數夕竟不能竊出語人曰勤讀  
若此焉得不發居鄉謹愿尤好慈善倡築淨居口天濟  
石橋工繁費鉅一人之力居多邑令葉昭敦雅重其人  
曾聘爲勸學所長云

葉景春字鏡堂光緒己丑副貢慷慨有大志揣摩時趨不

遺餘力惜爲數限不得大展其才僅三署教諭三得差  
委而已廉介性成樸陋自甘其在學任敝衣素食或至  
自饜嘗曰儉以養廉故所取一絲不苟民國初總長汪  
伯棠保薦知事需次都門竟以疾終所著有壓線集一  
卷庸盦雜吟一卷

人物志四

經濟

宋

程樟字喬仲資稟粹和局度起曠文史之外無他嗜好事  
繼母以孝聞待諸弟尤篤恩義授連州司理妖民龔陸  
以左道具獄推究其誑誤者數百人改知侯官聿新學  
宮日與弟子講禮習射守廉州政尚簡靜置平糶倉以  
濟民饑擢廣南西路憲使凡所舉刺不市恩避怨而獎  
誘後進尤拳拳焉

程榆字森之九歲能屬文既登第孤介特立耻事婬阿家

松陽縣志

卷九

人物

經濟

十七

居雅好作人嘗建義倉義學置田以膳師儒宰玉山時  
真西山疏其天資靖重心術端良慈祥愷弟藹然有古  
循吏風不報嘗倅鄞史彌遠挾勢干請榆却之及持廣  
左憲節彌遠惡其不附已榆安義命死不易志官至中  
奉大夫職秘閣爵松陽開國男食邑五百戶謚曰安節  
劉鶚字飛卿城西人淳熙丁未進士歷官至承議郎致仕  
歸雅意振勵後學撥田租一千五百石爲郡學養士之  
資今處州郡學之田皆飛卿所遺也又捐基建玉泉寺  
并置寺田五畝松邑仕宦飛卿最稱好義云

潘景夔字和叔初爲德清尉邑有富民爲盜所掠躬捕獲

二十人法當改秩同僚賀之景夔愀然曰是得無誑誤者耶若以幸賞爲心則吏卒鍛鍊以成獄吾不忍爲也同僚歎服

潘自中字時又爲江州司理時有吳門鹽商牽聯就緹吏承上意欲加之罪沒入其資自中曰入人之罪以媚人吾不忍爲也力雪免之州部將二人以軍賦牴牾擊於獄統戎者以宿憾欲死之符取自鞠使之誣服自中走白於府深明其誣二人賴其力以免

明

包彥齡洪武間舉博學宏詞授給事中至工部左侍郎爲

松陽縣志

卷九

人物

經濟

十八

人清儉自持不以脂韋目潤時大工繁興公協大司空勤敏幹練歲省國帑以萬計上嘉獎之

程罕鼎字九鼎洪武間辟舉出宰雄縣興學育才試士得劉觀竒驚曰此真昂昂千里之產異日必爲國大用觀後果登進士累官都御史賜一品祿奉王事按牘感知己恩爲文親祭其墓

葉廷敏字遜學永樂中爲太學生成祖幸學命講康誥克明德章次及天命之謂性章大悅之令獎錄勅同兩淮巡鹽監察御史薛公僉書時兩淮歲額頗重廷敏懇奏減鹽稅數千緡准人德之侍御將畢事病卒聞於朝成

祖勅云着監生葉廷敏了事罷廷敏奉勅守法事無阿  
避復命歸家遂隱居教授杜門不出有留耕集

程仲堅字希朴廉潔英斷不察察爲工永樂間舉賢良授  
監察御史上手勅曰朕惟明德慎罰以康兆民刑期無  
刑則朕嘉汝公徃巡方痛絕苞苴而激揚有法不屑屑  
彈劾上親書於御屏清白御史程仲堅云

周華字斯榮以賢良方正知武安會朝命覈實定賦乃與  
簿議武安土瘠賦重則傷民命遂實封以聞執政謂其  
變亂成法下獄治之有旨問所言出於簿乎對曰臣獨  
爲之簿署名耳竟坐法後武安直衛士千餘伏闕呼救

松陽縣志

卷九 人物

經濟

十九

上感悟復其官拜兵部郎中

包公貴字搢圭貢入太學授岳州判勤敏廉慎陞禮部郎  
中以外艱歸起補工部時國繕造徵材西川先是皆爽  
期坐法貴領事不疾而速人以神目之竣事告歸加四  
品秩家居躬耕清苦有古廉史風

王繼行字同倫己卯鄉舉授廣西道監察御史治最陞江  
西僉事冰蘖白勵秩滿疏歸僚屬多旛帳送之帳裂其  
文旛留其竿以見情耳餘盡却之

王成字允功貢入太學謁選授監察御史偕工部爲勳戚  
劉大秀等樹碑成後至觀碑次不合於禮入見上曰劉

汪二氏雖勳戚乃臣子耳不可與高皇帝碑並立必遠數十仞庶君臣之分明而報功之典盡矣上嘉之一日又曰王成好御史勅命南都簡治成牘核官吏能否京師肅然

潘榮孫字廷華永樂間由茂才辟試擢福建監察御史廉正公誠骨鯁不阿一切請託槩擯斥之吏如立冰淵時號鐵面神君方復命以疾終

王遂字仕庸年十二入邑庠中洪武庚辰鄉試下第將歸夜忽夢雲梯倚天躡而升之失足欲墮僕掖而陟其巔望見天闕次日有旨選士善書者入中書遂聞之就試

松陽縣志

卷九

人物

經濟

二十

於宗伯中選者二十七人親試之擢三人遂居二焉特賜進士出身授中書舍人凡一時詔制多遂書之上喜書清風團扇賜之

詹景威尚氣節敦行誼鄉舉中乙科訓晉江誠心作人將擢風紀以上封事忤權奸左遷夏邑幕邑民流亡將謀不軌威至單騎直入諭以義毀砮復業籍得民里七號新官里尋以艱歸起補諸城地久旱蝗官稅積十二年不能入民竄過半乃抗章乞貸設法捕蝗民盡復業長令政稍曖昧卽正色請改陞安福簿令敬其才勸曰君所至皆得民少順上可大用矣威曰吾強仕所以報君

親行已學也若屈節取寵不能乃乞歸憲臣交章薦之  
俱弗顧

詹雨字天澤英敏好學有襟期時值兵燹家造拂鬱養親  
務適其志父沒哀毀癯瘠喪事循禮雖上有五兄不少  
俟分勞有弟寶幼盡心撫育授以經業遂相繼登第雨  
初拜兵部主事清親軍宿弊與汪直忤出守建昌雅多  
惠政尋丁內艱哀戚膺疾起守韶州抑權門平瀧水積  
盜官至廣東左叅政謝事家居修祀禮講正學誘進後  
人至令誦之

周雷字時敬由歲貢判延安出鎮神木督倉廩謹度支崇

松陽縣志

卷九

人物

經濟

二一

學興教恩威竝行地接北邊數被侵掠乃相度地宜築  
堡防禦又地高乏水人多病渴令各鑿井利濟無窮及  
歸民皆遮道泣餞不忍別林下三十年無暴色疾言見  
邑政之有利於民者輒肯直陳

詹寶字天球叅政雨母弟弱冠方受舉業不數年而成成  
化庚子秋兄賦詩爲兆贈行果登亞魁丙辰登進士授  
新昌令土寇鄧遲八肆劫公潛出銳師殲之能聲大振  
將內召而性耽山水遂解綬入林斗酒百篇以樂天怡  
性所著有靜齋集

毛文邦號春野慷慨有大志登嘉靖庚戌進士觀吏部政

以母病疏乞歸養平生儀度溫雅智識宏偉孝友著而信義敷或以私託則閉門不內日惟讀書好古崇尚正學每有所心得起授刑部主事時方競進公獨恬退遠勢要疏乞改南官至刑部郎中讞獄多平反廉節益勵自鄉舉立仕三十餘年產業如舊卒於官幾不能殯世高其行稱曰清德先生

何寶號松坡爲人剛直有氣節好善嫉惡以濟人利物自任習易經任潯州經歷轉陞推官多善政

葉應榮號石崖少負穎資好讀書多所論著孝友爲邑推重萬曆乙酉由明經授監十載甲午除江西清江令地

松陽縣志

卷九

人物

經濟

二二

雖殷饒俗尚難治公寬仁平恕冰蘖自茹俸金外毫無號染興利除弊一切與民休息歷任十五日苦疾父老籲天請禱卒不愈士民塵悼設祭甚有憑柩送至衢界者

周大夏號雲亭篤雅廉介由明經爲長洲丞雖居佐貳力以四知自矢秩滿歸囊中惟書畫文具湯臨川知遂昌雅重其品過松必造廬款語焉

詹光宣號白覺由明經授新昌訓端方聞於觀察改容禮之令署縣多寬政轉諭石城土名立石誦德

詹世厚號懷素隆慶間恩貢爲南大司成所器令永春民

以積逋多苦刑公請除荒額稅實畝於是輸將恐後士民祠之誦桃源遺愛遷守祿勸州其俗右武阻文教公至爲興學立市州人德公亦建祠以報

毛汝科字孟甲幼有異質具遠志克敦實行以明經訓淳安諭樂會皆先行誼後文章攝會同篆無重刑厚斂吏習民安遷惠州授士民渡海遮留卒於官

劉燿字憲卿判泉州府廉謹愛民多惠政攝南安同安篆清耗釐蠹署海防巨寇鍾斌殲焉歸休時太史蔣公德璟司銓林公允昌輩爲著甘棠集居鄉尙義助建學宮置學田遇荒賑饑造橋修路累登賓筵

松陽縣志

卷九

人物

經濟

一三三

詹仰華號隣齋節行循謹司瓊州稅課略無染指壽踰八旬膝下四代人以爲盛德所致

王之祥號懷軒天性孝友事親盡孝聞於閭里由明經訓平陽旋授温州素性澹泊處之怡然與諸生惟講學課藝交勵文行而已後告歸林泉閒適數十年壽八十五程漢璧字光垣由三考吏給由効勞吏部考律取第三授鞏縣典史敏慎勤勞督理河道有功御史俞公題陞揭陽主簿告致歸

王汝勸號紹橋樸畧寬和常以濟屯救因爲事諸生時屢推德行崇禎間貢授奉化訓士感其摯性謂吾輩典型

也復諭武康歸屢薦賓筵壽七十三

丁日懋字進明幼奇穎篤志業儒咸以大受奇之歷試不就棄儒爲吏崇禎間任天河尉徵輸禦寇事俱有方院道獎薦轉柳州目而逝

徐志道字伯正少懷奇氣補訓術時藩臬重臣多奇其才畧正德初彭蠡盜王浩人據江西姚源洞上命御史俞公諫討之推志道爲率長練士多整齊所歷州縣無不求援於公公戰無不捷紀功第一叅將王公薦於上初擬爵公以指揮使時軍功濫弛志道馳歸不及面對大司馬僅授處州衛百戶都御史復上其功不報

松陽縣志

卷九

人物

經濟

二四

周鳳鳴號東田以文學而長於武備由賓貢授安仁訓導時賊盤結鄧埠廣寇流劫玉山大中丞胡公廉知之委以掌兵翊戰上方練師鄱陽而賊不敢侵胡公上其績於朝擢國子學正士民思之勒石於學宮所著有東田集

清

劉日勤字如始篤學醇行生平謹厚自守順治間貢授廣西上思州時廣西未下從事行間貧瘁憂積勞頓不避風雨遂卒於潯州之平陽縣沒於王事當道憫之程文安爲人勤慎守法待上官不干以私後任瓊州府經

歷教子萬里有聲譽序

王汝棐字篤甫登進士授行人尋管臨清倉革陋規釐貪  
焚倉儲豐裕擢福建延建邵道輯兵惠民風厲僚屬稱  
上游保障康熙庚戌主試福省安溪李光地號厚菴門  
下士也

毛有翎號蒼梧器度卓犖授貴州尉盜息民安俗婚同姓  
嚴革之轉應城修黌宮建先賢祠及期丁內艱父老遮  
道留立去思碑於學歸捐資修祠壽八十三

徐一卿號豐橋世德肇家幼習儒業長以簿書歷簡名郡  
居家雍睦庭訓肅清三子皆克肖爲邑之望少子韶勅

松陽縣志

卷九 人物

經濟

二五

建宗祠蠲租供祭邑尊佟公羨其世德優異給匾曰千  
秋俎豆

葉紹芳號少竹習爲吏勤勞任事非義不苟取與民排難  
不可枚舉擢廣東惠來尉縣城圯城中屢遭水難悉力  
修築士民受其惠至靖盜除奸莫不周悉解冠歸居閭  
里和藹睦隣壽至八旬

葉承芳號思竹以知印授瓜埠巡通商便民清廉盡職餘  
俸解還公帑道府嘉獎焉

劉應機字安山上安人由歲貢官廣東澄邁縣知縣地有  
珠池採珠者向有常分歸官機概却不受任滿致仕歸

行李蕭然郡守黃公匾其堂曰琴鶴遺風

陳湛字燕侯城南人兄弟友愛讀書相爲師友爲諸生聲  
噪膠序由歲貢選鄆縣訓導自守廉介束修之外餽遺  
一無所受致仕日徙步而歸

何承美字在中城東人敦誠古樸從學者甚眾與諸生講  
論必正席端坐由歲貢任天台訓導造士有方屢乞歸  
里諸生多扳留之卒於官年八十三

陳元颺字煥之城南人以拔貢任泰順教諭泰邑僻處甌  
南土氣衰靡文體卑弱元颺竭力振興取大家古文時  
爲指授士風丕變年八十四致仕歸

松陽縣志

卷九

人物

經濟

二六

蕭元偉字修宏城西人天資聰穎爲文雄壯俊麗由選貢  
入成均肄業學問益精司業深器重之授巴州判未之  
任而卒

葉燦字含華城西人由歲貢任昌化訓導每以端品讀書  
教率士子至今人猶頌之

丁瑗字聖友爲人慨爽敦行誼重然諾排解紛難<sub>十</sub>以私  
者正容斥之爲諸生士林推重乾隆丙辰歲貢選湯溪  
訓導年七十五未之任而卒

孟修彩字素先號澹園舊市人系出亞聖後天性醇謹篤  
於孝友好古博雅遊學武林受業於包銀河之門文章

行誼爲鄉里所宗邑令吳公甚加敬禮乾隆戊午以明經肄業太學已而回籍道出鄒魯謁亞聖廟考訂宗譜辛酉授會稽司訓尋丁艱起補上虞訓黜華務實考課必嚴士林深德之甲戌春以年高致仕紳士依依不忍別立去思碑於學舍又製謳吟傘致無已之情歸里後惟以詩酒自娛壽八十一

周光賢字輝德號寄亭爲諸生讀書敦品崇尚儉約教授生徒多所造就由歲貢任天台訓導倡議復興義學士人交頌之年八十致仕歸

楊孫芝號瑞庭世居玉巖伯兄孫華號峙庭季弟孫蘭號

松陽縣志

卷九

人物

經濟

二七

馨庭先後登拔萃科華候選直州判隱居不仕芝以舉人大挑知縣歷署吳江奉賢政績丕著丁西江南秋闈同考官戶部尚書揚州甘泉董醇出其門蘭以舉人大挑教職任壽昌教諭學者宗之兄弟蟬聯科名鵲起學政杜額其堂曰三鳳齊飛迄今子姓繩繩書香不輟所謂一門三拔貢人猶嘖稱云

葉大芳字席蘭城西人廩貢生品學兼優尤工書法歷任臨安嘉興石門縣學教諭所至有聲

葉佐清字葵生古市人篤學好古敦氣誼剛正有風操以增廣就教職同治癸亥攝永康篆在任五載振興文教

率諸生躬行力學崇實黜浮凡忠孝節烈悉爲宣達解  
任時供帳不絕於道詩餞數百首督學使者吳存義爲  
之跋並題其簽曰潘江贈行集嗣任於潛承兵燹後見  
殉難者夥肆力搜求爲拾遺骸請旌典不使湮沒童試  
名數取不滿額悉心陶鎔文風漸振刊蠶桑說略訓民  
種桑惟賦性骨鯁爲忌者所嫉左遷江蘇主簿需次蘇  
門瑞安黃侍郎體芳來督學委試署文巡總內外關防  
剔釐積弊旋補授丹徒主簿其地華夷錯處號稱難治  
抵任後裁革陋規寬嚴互用中外交稱戊子歲旱田禾  
將槁禱雨金山龍王寺用宋史禮志蜥蜴祈雨法大驗

著有圖說刊行吳孝廉麗生爲之序徐廣文嵩峻爲之  
記惠澤涵濡徒民感之顏其堂曰民之父母解組歸壽  
六十三長子奉玉次應龍均邑諸生季士龍廩貢生孫  
曾蔚起一鄉稱盛

人物志五

孝友

宋

葉洵仁字行忠宣和中盜起奉親逃匿遇賊奮身翼父身被重創不少却賊納刃相顧曰孝子也引去及長遊場屋不利家索母意不悅遂躬歷耕種務以悅親爲事孫重開從呂東萊學登淳熙十一年進士

徐鍠字振亮素以孝義廉節名嘗於冬月涉躡深山大雪中求窩煖之地以葬親親在閉門謝客周旋左右親沒乃從容遠遊鍠通六藝曾入僧房見寶藏不顧卒時屢

松陽縣志

卷九

人物

孝友

二九

空官爲題其墓曰清儒事聞於朝以大夫禮旌之樹坊額曰儒行

薛溶字平川繼母項氏性酷溶曲爲承順奉養備至每歲時爲壽率子弟羅拜積久項感悟愛溶若己出及項歿喪祭盡禮哭奠終身不替宋太史濂嘗稱溶之孝與西河王延無二而溶獨不得列史冊傳後世焉

蕭必强字公甫登進士事親備極勞苦疾篤每露香籲天祈以身代及居喪每慟絕而甦里人呼爲蕭孝子時舅氏無子歸田五十畝屬以後事及歿厚治喪葬立舅氏後還其田景定初舉孝廉不就

元

詹國芳性孝友元季兵亂親不獲葬寇至國芳抱棺號泣  
寇曰孝子也不忍加害既葬廬墓哀戚積雨廬壞體不  
受傷眾異之芳素好堪輿術得之不爲己私後世多縉  
紳亦積德行義之所致云

明

周玘性慈孝後母譖父逐之玘愈恭謹侍母疾頃刻不離  
晝夜焚香祈禱默佑忽床壁間見火光如手狀母病遂  
瘳居家端肅好施與鄉有時疫悉投藥以療之

劉順字子謙性至孝父故事母病竭力罄家資以請醫至

松陽縣志

卷九

人物

孝友

三十

廢寢食母將危刲股進療仍升屋焚香告天願以身代  
從屋投地死而復甦迄母病瘳絕葷酒以祝母壽隣族  
哀之事聞於上邑尹魏水洲表其門額曰孝子劉順

周輅字宗商家貧性孝贅外家母歿父欲以火厝輅方十  
歲號哭止之登宏治乙卯鄉薦授安東知縣時歲早蝗  
輅積誠祈禱不爲災燕居無惰容必正襟危坐宗黨景  
仰

潘璣字齋政天性孝友侍小隱公疾憂色戒心不離左右  
與兄弟瑜炯觥同居四十年常嬉怡無忤成化間由鄉  
貢擢鴻臚序班遷吳江丞先是舊族無祠歲時祭其家

璣捐資贖舊址建祠舉族德之

葉繼華年十六父簽解白糧洪武初軍興糧急令甚嚴違限者輒死四子皆進卮哭別華獨坐歎諸兄讓之乃言曰兄輩孝思止泣數行耳吾欲代父死奚哭爲父駭阻謂不更事華不聽比至果愆期將就市適同事有母子爭死慟哭聲震天司刑哀之爲抗疏上曰違期小失也焉可以是遽殺人因得俱釋家人世守其教不涉訟

詹春號慎齋貌莊履肅成化間貢授崇仁訓自愧不及封父捐俸修學請給父懷廉以訓導冠帶養孀母何氏孝聲丕振

松陽縣志

卷九

人物

孝友

三一

王詔號龍溪爲邑諸生居喪躬負土築父母墓致白雀蒼鴿之應讀書好持論每見古人節行輒隨筆以誌景行嘗遊治平寺聞藏頂嘆嘆有聲緣梯上視乃抄本一帙記靖難時從亡諸君事其字多斷爛不可讀止得梁郭十數人各贊數語題曰忠賢竒秘錄載吾學編中學臺蘇紫溪先生深向往之祀鄉賢尋孫令以奉祀生請如其議

詹明號志齋有學有度宏治間貢授武平諭家居廉靜自愛撫庶弟纖悉必公

葉元芳字邃府性孝友嘗瀝血焚肉以瘳母病學成遊四

方與王辰玉先生上下一時通顯贈遺暨諸餽悉以分諸弟八入浙闈爲副車者再其師沈莪山先生深惜之後爲高要丞有廣海青天之號監司薦擢崇義令以內艱歸不復出仕

詹朝宣號梧岡邑廩生多著作孝友性成父南野公卒居喪廬墓有賦詩退虎之異

徐鼎臣字忠孺天性至孝總角時母有危疾籲天割股幾絕若有神掖之乃甦母卒不起號慟廢寢食伯叔父強之進糜粥邑上其事院道交旌之服闋補弟子員以扶父櫬京邸勞瘁而卒邑人憐其死孝目其葬地爲徐孝

松陽縣志

卷九

人物

孝友

三三一

子墓

徐新化字心純天性孝友侍親先志承順純以色養無幾微有忤爲人復朴厚肫摯與人交呐呐不能出諸口光霽襟懷令人自醉刑于化行妻毛氏奉翁疾衣不解帶疾甚割股和湯藥以進翁疾隨愈舉家咸格靡不同風邑令申之學使者錫以純孝格天匾額且云立佳傳以待國史採風旌表不日可冀云

王幼學號懷茲弱冠遊庠居喪中外咸以孝聞家雖素封處之如寒士遇凶歲減穀價以濟人鄉里感其盛德年八十餘舉鄉飲賓子孫俱有聲鬻序

葉儼其父大全萬歷間從征三年不返儼冒險趨省歲大  
饑稻梁未實儼往刈禾爲漿以飼起諸同行而僵者大  
全適至相持痛哭遂與俱歸年七十杖於鄉列名旌善  
亭長子選禮通鑑史能持論規過勸學無間親疎樂其  
嚴而愛其直焉

詹瑗隨父嘉言任蜀遇流寇至父令全印慟哭不忍別父  
曰汝能全印方承我志不得已同吏齎餉以遁寇稍退  
營收父屍兩臺嘉其孝且有功請恤抱疾扶櫬歿於家  
有節錄傳世

毛汝智字樂卿天啟間貢敦友愛尤篤接引同調旣離產

松陽縣志

卷九

人物

孝友

三三

析居聽兄出納素養懿粹試輒高等以體羸不能大就  
時論惜之

毛炳文號桂林性孝友父病割股祈禱身代及卒母以家  
貧令其改儒業文多方孝養仍苦讀遊庠食餼凡親戚  
貧乏者無不周給復教二子成名爲時所推重

潘敦字子厚其父瑜及耄無嗣乃繼姪爲後旣生敦敦性  
孝友嘗自言寡兄弟不免杖杜之悲與繼兄家業悉均  
復以膳田供祀同與世守爲人樂善慕義種行陰德邑  
推耆賓壽九十六卒子伯冕伯韶皆忠厚有父風

葉同芳號景竹授楊州衛經歷終任還與兄弟砥礪爲善

修築道途百廢皆興里中煥焉改觀一時稱爲人傑  
周九道字禹開素行克孝父母病劇顛天割股三次名載  
憲綱院臺匾旌之曰孝達皇都初授興山尉慎勤有聲  
轉桂東巡幕念繼母老不便迎養告致而歸作斑衣繞  
膝娛其親焉

詹守之字長卿叅政公之裔痛念祖父遺跡獨任家事延  
名師課弟定之宗之咸有名膠序居恒嫺韜畧智勇過  
人以當事薦授處州衛指揮使

清

劉符升字季肅歲貢生上安人少失怙賴異母伯兄士望

松陽縣志

卷九

人物

孝友

三四

撫養成立兄弟極友愛符升病士望親調湯藥月餘不  
解衣寢督課家塾念弟未及親承庭訓泫然流涕符升  
亦相對泣努力讀書名噪膠序康熙十三年耿逆賊黨  
陷松執士望去符升尾賊後於中途貨執者脫士望歸  
自以身就縛至寨拷掠無完膚大兵至乃得釋其至性  
過人如此士望字公榆歲貢生

劉建英字鼎侯上安人性最孝父病刲左股以療後再病  
復刲右股母病亦然親歿與弟迪英廬墓側服既除猶  
與弟作哭親詩詞意酸楚讀者皆下淚兄弟相師友作  
文體格醇正康熙六十年恩貢候選教諭弟迪英字惠

侯雍正十三年歲貢候選訓導俱未官而卒

潘尙節字堯章城東人性孝友事繼母極盡子道繼母生三子俱幼父死竭力治家撫愛三弟延師教學均遊邑庠後分產已取其礲瘠以腴田歸弟雖異爨撫恤如初邑令陳公旌其門曰孝友良模

吳萬選古市人年十三失怙哀毀成禮事母潘氏凡事先意承志閱數歲母病棄世選號慟欲絕營葬市北赤溪朝夕省視如是者期年服闋補博士弟子員樂濟人急康熙戊戌歲大饑捐賑數百石設廠永甯觀煮粥賑饑全活甚衆壬寅又饑捐賑如初邑令楊命監督賑務辦理有法事竣各憲給額旌焉生子四俱登鬻序壽七十二而卒

孟淑思字子孺邑庠生外孟人天性篤孝父病寢不解衣尤慷慨好施雅有麥舟之風幼習壁經晚益洞徹於傳註之外細加箋釋壽至八十有三

洪士陞字爾登舊市人性和易善排解紛難遇鄉里貧乏者必黽勉周恤之尤敦孝道母方氏早故父續娶汪氏家窘陞與室朱氏自食麤糲而養親必謀旨甘父病侍湯藥衣不解帶者數月卒之日擗踊嘔血絕而復蘇後居繼母喪亦然及葬廬墓慟哭葬之日有丹鶴一雙飛

鳴墓上移時始去人謂孝思感召交異之乾隆元年當道上其事奉 旨給帑銀叁拾兩建坊以旌其門

劉元瑞字應麟城北人明知縣崇祀景賢祠劉宛懷之孫也宛懷居官清廉貧無以歸子一經遂家松邑至元瑞而家計彌索然自以清白吏子孫砥礪廉隅事二親最孝母王氏疾篤延醫不效元瑞祈禱於神願以身代病隨愈及後居喪擗踊嘔血氣絕復甦者三享壽七十二而卒人稱其敦品而孝思尤爲純篤云

許元麒字光振本籍晉江康熙初自平陽徙松爲人孝友雅篤兄弟之誼兄歿姪孤且貧麒爲之喪葬并揭姪於

松陽縣志

卷九

人物

孝友

三六

家代婚娶撫育人隣里有貧乏者輒周恤之乾隆四年邑令吳雅重其人薦飲賓宴

蕭元侯國學生字漢畱城西人幼失怙母撫養成立生平重然諾好義舉雍正己酉歲饑煮粥賑民全活甚多黃公渡屢溺人造船以濟子三長廩生懋禧次貢生懋學懋爵均有文名壽八十有五子孫繞膝

王謨王村人文童孝出天性母葉氏病篤祈禱願以身代竝刲股和藥以進母故後哀號孺慕成疾而終鄉鄰至

今稱之

以上舊志

吳宗美字兼善周安人幼失恃善事父兄孝友之稱人言

無間父兄故後撫四孤姪均婚娶始析箸性公直好施與鄰里有爭競者得宗美理解頓息貧民向糴輒多予穀三五勛不吝重建仁安橋造祖祠不惜費家訓綦嚴子家齊入邑庠孫必菘中學畢業享年七十有八今歲修志其子克紹父風慨捐大洋五十元邑候陳獎給天倫怡樂匾額以旌其閭

丁紹清字子廉城南人拔貢生杜門不問世事事親至孝父死披髮徒跣形銷骨立及葬後詣墓哭祭三年如一日知縣范祖義踵門敦請掌教小義學不就聘爲西賓亦不就

松陽縣志

卷九

人物

孝友

三七

潘文泉字有本歲貢生城南人母蔡氏眼生白翳醫治三年不效雙目失明人告以舌舐之法乃每日晨起以舌舐母目半載餘翳漸退眼復明邑人士咸稱道之

徐學元字亨甫國學生性孝友同胞四人年十五喪母繼母蔡氏復生二子蔡及二弟時虐待之元忍受而已家素貧以力耕資俯仰父歿析居獨養繼母不以累諸弟兵燹後闖闖經營得以溫飽諸弟卒姪輩有不能自立者悉爲婚娶生平樂於爲善力行方便卒年八十有七訓導徐士駢以碩德耆年匾額獎之

潘學綜國學生城東人父早卒恪遵母教善撫幼弟母病

年餘自奉湯藥母故茹素三年光緒四年有司上聞旌以孝友可風匾額弟學化增貢生奉母孝事兄謹凡事必稟命而行時人以難兄難弟稱之

葉宅成城東人徙居石筍腳生有至性少兄五歲父早亡以事父之道事兄同食同眠朝夕相依並耕隴畝獨任其勞善捕魚入市易錢則必購甘旨以奉兄自幼至老無或懈焉年六十先兄卒民國六年知事錢世昌爲立悌弟碑於秀峰觀以表之

葉慶瀾城北人年二十入泮家貧苦讀父疾篤割股作羹以進母知而責之瀾曰自父病急兒割股已非一次矣

松陽縣志

卷九

人物

孝友

三八

惜天不假以年二十九歲而卒

徐培桂徐村人生平好義篤於友愛胞弟培林夫婦相繼逝遺孤甫三歲代爲撫養視如己子及長教之讀書入邑庠復爲婚娶以續禋祀享壽八十有九而卒

蔡儲鴻城東多寶社人生四歲父遊幕他鄉賴母撫養以至成人刻苦自立奉母撫弟承歡膝下甲午父外歸逾年歿尋喪母嗣爲弟授室或問曷不自娶曰子無力兩娶弟有後父不絕祀吾願足矣年三十三而卒

潘學敬字子一家貧好學品學交脩動止必循禮法父歿守禮盡哀旣葬亟欲廬墓母止之不得已每晨詣墓拜

哭如是三年雖嚴寒烈日疾風暴雨弗間服闋兄令析居婉諍不納乃取陋室窳器歸已躬耕自樂然卒因是積勞成疾年二十六而卒鄉黨惜之

許國榮國學生下弄源人父早卒事母至孝母死三年不茹葷及兄卒視兄子如己子督令讀書習武待弟亦然温培淦字麗生丁年失怙母氏劉病痛痹疾偃床十六載手足不能動淦服侍湯藥朝夕無間有幼弟四扶養成入謀立家室尤好教子弟讀書光緒中弟知新子汝玉均蜚聲譽序云

葉維周字郁文莊門人性至孝母故後罷讀歸家躬侍父

松陽縣志

卷九

人物

孝友

三九

側不離左右者數年復請父娶繼母張氏育弟四次弟樟棋性放蕩母教之綦嚴有時母怒加撻楚周卽長跪爲弟代罪弟亦感而歸正三弟封唐善讀書有才畧光緒壬辰府試冠軍知府趙亮熙羅致之周爲治裝令從之厥後唐人杭城法政畢業及赴都考試知事一切資斧周雖分居皆力爲籌助其孝友兼盡人咸稱之温亦臻世居橫溪幼失恃甫七齡父陷獄卽能負米入監服侍不缺長而奉親必有酒肉冬温夏清未嘗或疏父所嗜者雖值雨雪昏夜必入市購備家赤貧自奉彌儉事父獨豐有時乏錢雞鳴卽入山樵採賣薪易肉歷二

十餘年弗懈

程芳高古市人家綦貧父歿後兄弟六人各自成家惟高與母王氏共居處相依爲命業賣餅傭日賺錢文悉市甘旨以奉母而已則疏食破褐晏如也人勸其娶妻則以奉母不足安有餘力畜妻辭食色爲人生公性高惟知有母而已之衣食妻室若均不知者人咸以大腐稱之民國某年母死日夜悲哭謀喪事及葬畢遂投程家埠溪伏水以殉嗚呼若芳高者未事詩書而孝行若此可以愧世之士大夫矣雖名大腐實不腐爾

葉葆忠字耿夫性至孝古市人父業賈遭咸同之變離亂

松陽縣志

卷九

人物

孝友

四十

間百計護父亂平後入邑庠旋補增以父年高棄舉業隨父服賈以時定省孝養無虧家亦小康舉凡立社倉辦學堂設局保嬰汎舟乞糴興造橋梁皆其優爲民國紀元公舉爲古市區議長享壽七十有八而終

王林基兄弟六人家無恒產相將隴上推逸任勞其兄弟相處共爨五十六年一家四十六口有姜家大被之風鄉人傳爲佳話

連明照字居仁城南人性至孝家貧母有疾親侍湯藥衣不解帶顛天割股願以身代母病愈勤儉持躬家遂小康生二子長步青次步丹均列膠庠食廩餼民國八年

奉 大總統褒以孝闕流芳四字壽至七十二而終  
吳人德橫山人性至孝事母定省無缺母逝慟哭甚哀氣  
絕復甦殯葬盡禮廬墓三年錢知事呈報 大總統袁  
旌獎孝闕流芳四字匾額

徐良字茂善徐村人事父孝父疾侍湯藥衣不解帶父逝  
卜厝巖西庄之烏山築室於場獨居三年後因不忍遠  
離父坟遂就巖西而居焉孺慕之誠終身不改詩曰孝  
思不匱良足以當之矣

毛鴻賓字邱池烏石壟人事親孝母疾危篤延醫不治祝  
告天地刲股和藥以進

松陽縣志

卷九

人物

孝友

四一

吳肇德字讓三大竹溪人與兄肇慶同應府試太守趙亮  
熙面命之曰此次案首本擬取生惟弟不先兄讓兄何  
如德曰應爾其兄亦辭弗受彼此推讓趙太守嘉其和  
睦贈以友愛可風匾額

徐之海字乘桴大竹溪人弱冠失怙事孀母孝友于兄弟  
內外無間言凡有義舉無不慷慨樂輸享壽九十有二  
徐學潼字梓材大竹溪人天性孝友事母能承順意旨視  
仲季一體相親族鄰鄉鄰皆器重之壽七十七而終  
蘇漢相寺口人咸豐辛酉髮賊擾松鄰人之子被擄歸咎  
其兄漢管管欲往代以贖回鄰人之子相曰兄有妻子

勿去待弟前往遂去被賊執數月幾遭殺戮其輕身重義如此鄉隣至今稱之

闕聯輝字蘊山邑庠生石倉人天性孝友處世謙和年逾八旬五代同堂民國九年奉大總統徐褒題鄉里矜式匾額并給紅綬銀質褒章

闕玉鑣字鹿鳴石倉人附生幼失恃事後母以孝稱生平重然諾好義舉凡親親睦族追宗尊祖諸事纖微備至歲丙午族議回閩修祖廟鑣年老志壯奮力前往及事竣歸積勞致病卒於中途聞者皆下淚教授陳贈以匾額曰孝思不匱

松陽縣志

卷九

人物

孝友

四二一

葉成章字達材恩貢生后畚人性孝友家淡泊兄弟有八章舌耕餬口獨自奉親不諉諸弟並能以束脩所入周給之在石倉源設帳多年循循善誘裁成甚眾遊其門而入泮者不下百餘人徐大宗師給以匾曰勸勵有方王啟美字實甫國學生百步人天性孝友事繼母以孝聞歲壬子項車圩堦堤被沖部賑修復人皆畏難美獨任其勞泊工竣温處工賑督辦陳以工程堅實辦事認真給予勸工盡職匾式用昭激勸云

闕起章字五雲邑庠生茶排人早失怙事母孝撫四弟同居數十年友愛無加教諸弟遊庠食餼入成均且慷慨

好義如焚券還遺恤寡助葬諸善端不可枚舉

湯廷豐靖居人家赤貧事父母以孝聞弱冠時父病寢不解衣顓天割股願以身代父歿哀毀骨立母勗之曰汝能自立即可以慰汝父矣徒哭何益豐聞言克遵慈訓卒以勤儉成家鄉里稱之

湯永梧字培芝呈回人事父母至孝父病顓天割股以代湯藥父卒哀毀骨立鄉人皆以純孝稱之

湯永魁字光明呈回人少失怙事母盡孝母病親奉湯藥割股以進母病果瘳人以爲孝心所感云

許爲芬字春圃國學生城北人至孝性成終身孺慕生事

松陽縣志

卷九

人物

孝友

四三

葬祭恪盡其禮生平洞明世故誠實無欺且好行陰德爲人排難解紛嘗憾身爲境困未能力學成名故課子嚴子作舟以丁酉拔貢署嘉興教諭人咸謂孝心所致忠厚之報云

劉炳基朱山頭人家故貧性至孝養母每食必供甘旨遇荒年計無所出則求乞以充之凡乞之所得未進母不敢食知之者嘉其孝必多與之俾歸以奉母里有新聞輒述於母前以娛樂之如是數十年及母卒而劉已老念行乞終爲先人羞竟甘餓而死

高沛然字雨軒斐然煥然母弟幼讀書師事兩兄極恭順

學書最勤仿顏柳畢肖天性純摯死父不飲酒不茹葷  
廬墓年餘母速之歸土人誤以廬墓爲看守殉葬財幣  
竟竊發其父塚不見財幣憤而燬棺災及骸骨沛然奔  
赴墓所一慟幾絕遂嘔血死時年二十五遠近惜之  
高自牧煥然第三子庶出天性純孝聰穎絕倫幼有孝童  
之稱年十六入中學生母以暴病卒自以不能親侍湯  
藥書生我劬勞四字於座右日夜憂泣哀毀骨立遂成  
咯血之症逾年春方爲母營窀穸憂勞交并身遂隕校  
師暨諸同學咸爲立傳稱高孝子邑紳許作舟等援例  
聯呈經奉甌海道尹張批准彙案褒揚矣

潘樟林西河人母死父老家赤貧負薪爲業以供旨甘父  
又多病藥餌不少缺偶有不繼則自忍飢一日父病發  
林方負薪歸已晌午矣亟奔往城肆購藥歸方自食又  
每食必俟其父先食定省溫清順意小心數十年如一  
日人稱爲潘孝子其父以壽終喪葬殯祭盡哀盡禮林  
不讀書其孝行且若此可以愧世之翩翩公子矣

人物志六

篤行

宋

潘宗回字幾仲登進士第由秘書郎出宰延津通判杭邵  
洪三郡知福州兄弟聚居三十年敦睦無間鄉人稱之  
王允卿字成之尚義好施嘗往栝城索債宿其家夜遣妻  
叩門卿閉門不納遲明即還不復索每寒旦視鄰屋不  
烟者密以米置之歲饑山民煽亂輒私議曰我等至縣  
必驚西門王朝奉奈何遂終不入邑民賴以安世有蜀  
西黃承事之比子唐珪至顯官

松陽縣志

卷九

人物

篤行

四五

項宜中字誼甫嘗憤激世變作窗蠹賦以砭其迷族有橫  
逆者奪其田曰在彼猶在此也嘉熙間歲祲郡守馬光  
祖欲行富鄭公青州故事誼甫即先輸粟二千石以應  
之既而卜築山礪以學囿鉛槧爲事尤好內典語人每  
以佛稱之

明

葉福景泰間舉人家貧教授束脯不盈十往往館未解而  
粟先支歲暮僅餘一金歸道遇殮殍福心哀之欲爲之  
謀葬倩工無資婦出絲縷以佐之越明年即發科人謂  
陰德之報云

詹源字朝宗任湖廣楚府教授初見王無所饋獻以二帝三王之道上啟王嘉其言及掌簿正司出入却分例王益賢之謂世子曰詹先生學行近古剛方正直汝宜師之幾三年辭歸構屋一區與子姪業儒者居之及定房籍請書契公曰汝居之卽汝之屋何用書也平居足跡不入公門邑尹就見欲爲治居公竟辭焉

徐萬松字茂松幼失怙事母以孝稱動履方嚴以明經訓樵李俗尙侈靡力正之士風丕變轉授南安紹明正學臺省交薦拂衣歸所著有吳中劔南嶺北諸草藏於家葉以章字振凡萬歷癸巳選貢任東平州同知陞衛府審

松陽縣志

卷九

人物

篤行

四六

理平生孝友慷慨及歸林下倡義建學賑饑糜酪年八十六知府鄭奎光造廬延舉鄉飲賓有詩文行世通庠呈請配許楊二公祀四賢祠

包洪伉字以謙嚴氣介性博聞敦善少與五雲李公誌同學以意氣相期許李掇巍科官冢宰伉幾獲雋終爲遺珠後李還梓里亟延道故適林邑令不快於司李李孽其短伉不避直言令治行始獲全不受謝令與之交亦不干以私令高其義壽八十三

周繼梁號西屏事母孝撫諸弟成立同居數十年無間言爲人公忠服衆里有不平屬其處分俱息縣建學宮文

昌尊經等閣董工忘勞出入度支如衡壽七十三  
周體明性好善喜施與鳳臻門外修路五里助建橋梁行  
誼克敦著於族黨壽九十六髮妻齊眉子一芳有乃父  
風獨建東嶽宮粧嚴佛像萬厯初年施粥濟饑一月  
周鳳樓號仰亭垂髻入泮選補南雍太學生負才期大受  
卒偃蹇不偶後授副貳慨然不屑生平賑貧焚券且買  
山收道殣無主者蓋有仁厚之風焉  
潘繼亨號新陽篤志經史博洽淹貫中歲食餼壯心迄暮  
不衰爲人天性醇厚立行端誠常以誘美救過息爭施  
與爲事誠儒行中表表者

松陽縣志

卷九

人物

篤行

四七

葉經試字適南侍母疾垢穢必身親不委婢僕事儒不售  
日結詩酒交束脞延四方名師教五子俱採芹

潘國器字汝賢天性曠落與人和厚多積行善事兩院旌  
匾曰尙義曰敦善壽八十八卒子繼統庠生克承父業  
賢聲播聞次子繼續亦克紹乃志識者謂爲善行之報  
云

清

李起增十八都人秉性敦樸言笑不苟隣里有爭競者增  
以理解之輒讓而退居家最儉約好爲義舉歲有餘積  
則修道路橋梁不自封殖課二子讀書延師必恭敬皆

得早歲成名

葉龍光字繼先庠生世居桐溪光始遷居城北敦品行好施與名重鄉里少失怙恃零丁孤苦卒能振興先業晚年謝家事日以栽花種竹爲事長子仰舜監生次子仰禹庠生克成父志多義舉董修學宮及邑志二子與有勞焉

潘延銘字惟新邑庠生驥湖人少孤竭力事母教諸子以義方家規最嚴爲人真率遇貧而好學者輒周濟之有六子其五景滋監生有白眉之譽乾隆丁亥修學宮戊子修邑志皆董其事不憚勞瘁

松陽縣志

卷九

人物

篤行

四八

鍾紫選閩人寄籍松陽爲人敦樸舉農員

王天耀家貧親老業商閩中以供雙親妻蕭氏左右侍奉無怠容翁姑深嘉其孝耀爲人確守法度和睦鄰里一生不履公庭乾隆五年邑令吳卓舉鄉飲夫婦年俱至八十

潘繼相字廷侯監生城南人樸誠恂謹年七十餘以齒爲房族長每祠祭族人畢會相輒諄諄以孝悌忠信勸勉至情懇切子姪得其教益者多

潘繼濤字宗海邑庠生孝友性成年十七居父喪哀毀盡禮事母劉氏備極色養撫季弟成立學憲顧公厚相期

許招濤隨任讀書以便指授時以母老弟幼辭會家業中落遂棄舉子業服賈數年頗饒於財然以濟貧周急爲心不厚自封殖也潘氏舊有宗祠年久傾圮濤獨任修建捐置祭田邑令吳給匾獎之

何應訓支木人賦性敦樸生平嚴取與重然諾里閭有忿爭者婉言和解不使涉訟人咸服其公正

潘延杲字旭光善觀社人善屬文弱冠補弟子員素性剛方慷慨樂於施濟蠲義粟造橋梁振貧扶困惠周鄉里雍正甲寅督學師以優行咨部升入太學援例捐貢享年六十六而卒

松陽縣志

卷九

人物

篤行

四九

劉朝賢字君輔國學生界首人務耕讀從不干外事望廬者雅重品誼其爲人恂悞無華猶有三古之遺風焉以是名高月旦前邑令吳曾贈以匾

孟廷璋字蒼佩貢生侯選縣丞舊市人讀書善屬文精草隸之法遇事勇爲才猷練達修古市文昌閣與潘某等捐田給寺朔望收拾字紙又建造育嬰堂重修文廟董修邑乘尤樂於施濟隣人某因貧鬻妻璋以金遺之夫婦完聚姪某貧而孤代爲婚娶歲周其衣食義聲藉甚蕭懋禧字鳳占明倫社人邑廩生孝事父母讀書善屬文歷試高等規行矩步足迹不履公庭雍正壬子邑侯孫

乾隆丙辰邑侯劉並給匾旌之

葉上正字端節謙和恂謹晚年彌自斂抑閉戶不出訓誨子弟日取孝經及內則弟子職令熟讀之每日爲人之道盡此矣無他求也康熙五十一年壽登杖國飲鄉宴邑令給齒高德劭匾額旌之

葉增初爲人恂謹足迹不履公庭人或干以非義第和顏却之不直拒其非歲會計所入除食用有餘則酌濟親隣之貧乏者或勸其置產則曰積金不如積德吾懼無德以貽子孫何以產爲康熙二十五年薦飲賓筵郡守竇手書作賓王國匾額旌之

松陽縣志

卷九

人物

篤行

五十

程奇峯字幹侯城北人幼失怙家貧母徐氏躬勤紡織教令讀書弱冠遊庠食廩餼充乾隆戊辰歲貢一生確守卧碑事孀母菽水承懽備盡孝道授徒家塾先器識而後文藝松邑名士半出其門享年九十而終

鄭衡字廷侯邑庠生天性淳良好讀書不干外事鄉里有爭兢者輒排解之人服其公性尤好施與舊市宋某無力婚娶衡助金完聚更督義方之訓五男咸入鬻序壽六十而卒

蕭懋爵字公言邑貢生温和淳謹性樂急公素行與人無爭足迹不履公庭鄉里咸欽重之

以上舊志

詹起仁字性生城東人仁厚誠篤品行端方生乾隆辛酉  
終道光戊戌實年九十八歲以閏月推算計一百零三  
歲時值覃恩知縣湯竹筠遇以優禮且贈楹聯云幸生  
天下太平日又見世間長命人後趙邑侯贈以百歲餘  
匾額仁者必壽名副其實斯亦可謂人瑞矣

高永炤象溪人寄居蓉川幼爲人傭主人有女方少艾適  
寇亂炤負入深山避匿數日不少染坐懷不亂人皆以  
魯男子目之後以勤儉起家置肥田十餘畝中年生一  
子弗肖炤乃以其田盡撥入宗祠俾存裡祀後其子果  
遊蕩將父餘產廢盡其先見之明又如是嗚呼世之擁  
厚貲者每溺愛其子而弗悟及至身亡家破裡祀不保  
者比比皆然如炤者可以愧矣

葉文鈞字在堅大塔頭人太學生樂善好施高年碩德壽  
九十一而終嘉慶四年夏浙江布政使司謝啟崑錫以  
星標上闕匾額

楊光恩字晉軒弟光寵字少峙均孫華子幼承家學聯翩  
繼美恩尤工書試輒高等以恩貢生候選直州判曾隨  
叔研菴入簾看卷去取悉當甚得倚助寵姿性聰絕綺  
歲食餼咸同間髮匪入松與葉葵生廣文共籌召募設  
計防勦民賴以安撫憲上聞獎給軍功以旌其義咸稱

爲難兄難弟云

周大林金竹村人附貢生秉性和藹聞鄉鄰有詬誶爭鬪聲輒出排解人有犯之唾面自乾里中子弟有不勤職業不敬親長者林必殷殷苦勸聞其言者多爲動容木鐸卣人洵足當之

楊志簡字居敬玉巖人郡廩生好讀書通醫理性醇謹平居與鄉人處常曰是非窩裏人用口我用耳鬧熱場中人向前我落後可想見其爲人

葉茂潤梨埠坑人賦性質樸待人接物和煦如春風然律己甚嚴教子唯義方是訓迄今堂聯四代順聚一門卒

松陽縣志

卷九

人物

篤行

五二

於宣統三年享壽九十有八子瑞財現年八十有三精神猶自矍鑠人瑞之徵一鄉稱之

楊餘慶玉巖人嘗在村之普濟橋拾一銀包意必行人遺失乃在橋伺候忽有踉蹌奔喘而來循途尋覓若不勝其徬徨者慶前致詢其人曰予販大布得價洋四十元全藉此小本周轉冀獲蠅頭以養家口今失慎一家休矣慶曰原物在此慨然與之了無難色其人拜謝而去  
潘文杰字蜚聲城東人清廩生通經史工詩賦孝友性成  
遇公益事慷慨輸捐子三長學霖歲貢生任金華教諭  
學問淹通文章宏富屢試秋闈三薦不售性尤樂善如

整頓保嬰局建築貞文祠皆力董其事歲庚子衢州土匪倡亂謠言四起舉辦鄉團以靖人心學師樊芝生嘗題贈曰有守有爲次學綜三學化俱有孝行一門盛德遠近稱之

祝時元字善長石馬鋪人例貢生爲人秉性樸厚待物誠懇對於地方善舉靡不悉心提倡惓惓以扶危濟困爲己任東鄉人民實倚賴之享壽九十有七夫婦齊眉同堂五代光緒癸巳宗師陳給奇齡遐福匾額以旌其閭子四長永清歲貢生次三永封永熙國學生季永昇武生孫階平邑庠生濟濟繩繩一鄉稱盛

松陽縣志

卷九

人物

篤行

五三

蔡銑字荆三城東人恩貢生器識高超才華軼眾工楷書教育子弟多瑚璉器非公不登長吏之庭識者咸推重之子夢蘭夢芝夢芬均遊庠

許景銘字瑞蓮城西人兄弟五蓮居長友愛過人天性純篤樂善不倦凡地方善舉如築橋梁建寺廟濟貧寒恤親族無不盡力爲之口碑俱在彰彰可考子若孫蜚聲庠序人以爲忠厚之報云

許紹榮字仁齋邑庠生品學純正士林共仰生平臨財不苟見義必爲如濟貧窮施棺木修古墓繕橋梁善事不一而足設帳數十年從學甚眾其行誼蓋可風矣

包世清字蘊山恩貢生橫樟人樂育爲懷好行善事如倡  
修文昌宮推廣育嬰局刊送敬竈全集慈航普渡諸善  
書逢人勸善孳孳不倦家道貧寒舌耕餬口然有時遇  
貧困者輒傾囊相與甚至解衣衣人自家飢寒有所不  
計人恒以迂腐目之而彼則處之怡如享壽七十有三  
葉成雲字岐山增貢生后畚人存心忠厚處世和平規行  
矩步足跡不履公庭里有爭競出爲排解人皆服其公  
明

徐葆原字初生古市人郡庠生淡進取精堪輿爲人秉性  
和藹慎重寡言而獨勇於任事曾任古市區議長凡地

松陽縣志

卷九

人物

篤行

五四

方興革事宜靡不悉心擘畫如清釐積穀修築安保大  
堦市人實利賴之

劉世鑑千義坑人幼失怙恃爲人尊敬長老正直可風縣  
學李贈以匾曰達尊有二其弟世鎰樂善好施李儒學  
亦額其廬曰年高有德伯仲齊年壽俱八十餘子孫振  
振一鄉稱盛

楊光淦字麗生孫蘭第七子邑廩生因事被褫旋入國學  
性冲和處鄉黨洵如善屬文尤工詩饒有唐音四赴  
秋闈三獲薦卒以數竒報罷授徒十餘稔門弟子入庠  
食餼貢成均者不下六十餘人民國紀元舉爲禮制科

員旋任毓秀高校成淑女校教員作中文砥柱造就尤多知事錢匾其門曰學醇行粹道尹黃顏其居曰矜式鄉閭壽七十有八著有寒瘦齋詩集子志彥志齊俱廩生彥尤著屢試優等秋闈獲薦惜享年不永聞者傷之葉瑞萱玉巖人孝友性成尤好讀書嗣患咯血遂不能竟其業子永滋克承父志好學不倦砥節礪行望重一鄉曾任玉巖區自治委員絕私餽急公義一毫不染百廢具興當清季科舉初停滋卽倡設啟秀小學以開民智東隴爲玉巖至城必經之路一溪兩渡春水泛漲人多病涉滋爲別開孔道以便行人又如建築同德和義各石橋均爲竭力捐募始終其事本年修志分區捐貲玉巖獨多蓋由其信望素孚故取攜較易也生平彌篤本源修祖廟增祀田豐祭儀誠敬將事不但舉族觀感尤足矜式鄉閭故一鄉稱善人焉

葉葆元字善甫邑庠生性剛毅有奇氣學綜其大於醫道有耑長善吟咏見世道淪夷國事日非每於酒酣耳熱之餘一寄之於詩歲丙午遊滬組織競業學會創辦旬報以提倡民權開通風氣嗣以徐烈士敗於皖秋女俠仆於浙大江南北盤查壓抑幾無民黨託足地同志星散元亦歸里籌集經費設公益社實行開荒造林雖無

效果實爲吾松自治機關之先河時適縣議會成立被舉爲議長博采廣咨折衷眾議其最著者處州軍政分府來松續收北伐捐元遽電省請命謂南北統一尙何有北伐名目事遂寢丙辰雲南起義共和再造紛電江浙約同請復地方自治元前後上書國會痛言非復自治無真共和終非利國福民之道兩院議員均聽其說決議咨交政府施行惜自治未復而身已返道山享年四十有九著有醫案遺稿

葉祥麟字瑞青古市人邑庠生初其祖佐清任丹徒主簿父奉玉省親卒任所祥麟弱冠遊庠以家世儒素父骸

松陽縣志

卷九

人物

篤行

五六

未歸日夜悲思乃與兄有麟節衣縮食以教讀餘貲往丹徒囊父骸歸故土及歐化東漸從事辦學任古市貫一高等小學校長管教兼施寬嚴互用經省道縣歷屆視學視察傳諭嘉獎迭至七次學生畢業以去留栝留杭者不下數十人乃竟積勞致疾享年僅四十有一張開甲字芹傳城西人浙江兩級師範學校優等畢業生歷任高小學校教員錢知事器重之薦任勸學所所長任事後竭力整頓學風丕振惜勞力過甚精神漸疲未及二載一病身亡學界中人咸痛惜之

人物志七

文學

宋

劉澹然字安道博極羣書嘉泰壬戌進士歷宜至秘書省  
著作郎初安道之爲舉子也遊三衢試士以風雲龍虎  
之賦魁於眾作郡守史相竒其才而館穀之邑人項安  
世徙江陵其子容孫以浙東憲使行縣展墓安道以啟  
致之曰立春繡於霄漢之上孰不慕公子之威名耀畫  
錦於井落之間我但羨長卿之風度又曰千萬世之人  
物山川盡收入吏部精神之表八十歲之鄉隣父老尙  
松陽縣志

卷九 人物

文學

五七

能誦平翁卍角之詩其俊逸之才如此著有午溪集

元

周仲瑜父此山先生館職不受仲瑜承家學益肆力乃以  
辟授稼軒書院長改紫陽書院  
練進字長卿少博學通春秋尤精於律至正初詔入翰林  
終登仕郎大司農豐潤署丞

明

王景字景彰號常齋修癯美髯平居好挾策矢口成章時  
稱其文章上繼屈宋下並班馬洪武四年與楊宜同中  
鄉試初授懷遠教諭陞開州知府以考最陞山西右叅

政無何下吏以糧撓法累謫滇南靖難師起會赦至京師成祖繼統擢爲翰林學士一時詔勅皆出於景景居官立朝不變鄉語知者謂其才高故用是以自晦耳一日上欲出師值大雨上不懌景從傍語曰此乃上天爲陛下洗干戈耳左右不辨其語衛士竊奏之上大悅卽擢爲親軍指揮使景後徙居池州銅陵縣有詩文集

包仕登字文學從王西山先生受尙書得聞性命道德之學應賢人君子聘爲國子助教一日明太祖召入武英殿賜坐陳二帝三王之道稱旨顧謂近臣曰此吉人士也以時訪問數有匡正陞齊府長史潭王以其聞望雅松陽縣志

卷九 人物 文學 五八

重之高麗國亦聞其名所著有兩庵和陶壁水海岱等集

潘靜字紹安敏資絕倫博極羣書有倚馬才永樂癸卯鄉薦清操自守構小閣閣扉讀書著五經疏二十一史定論續性理奧旨未及行世卒

周景辰一名煥以字行號東蒙生永樂中學士王景彰薦入文淵閣纂修國史試以鴛鴦菊立就曰漢宮瓦冷夜來霜佳菊凌寒獨弄芳竣事擢知閩連城松溪二縣吏民愛之練魯得景辰上元應制詩誦之曰此詩直壓倒文淵閣矣家有東蒙集

劉誥字天章嘉靖乙未選貢初援河間博士其教人也默坐澄心體認天理其檢身也業業兢兢雖步履亦不敢少失尺寸在仕途二十年歸家惟閉戶讀書暇則灌園種蔬嘗曰吾惟知修吾性命之學而已更何爲焉

徐夢易字徵伯號龍陽穎悟特達淹貫該博詩字俱工作文數千言立就廳嘉靖乙未選貢入國學冢宰費鍾石公異其才華薦入西苑草制一時文翰傳於中外官京衛武學教授疏建大閱場築外城皆切時務進大易叅同契解以辟方士歸構愛日堂養老母撫孤姓宗黨多景仰之隱居留名山喜談元學所著有徵伯集讀書記

松陽縣志

卷九 人物

文學

五九

四子遺註五經臆說李杜詩評皇明律說又衍易學全書未竟而卒

程鵬字叔南勤學敦孝童年列膠序足蹟不躡公庭聚徒講肆知名士多遊其門甘恬退膺賓筵益勵操修宗祠久毀鵬爲新之隆慶間修邑乘多其手筆

周翱號岳山少魯甚日讀一行不成誦其兄負笈於甌之名師翱往視一日言其心空去如有人開之者兄大異授書輒習讀書夜能記書半針行文落落不羈遂稱竒童甌人婚焉其師偶語東嘉令令親試道府亦親試俱以大器目之時文衡臨括道以已官舫送翱歸之遂入

泮登浙榜賢書張相國孚敬其友婿也以翱不第欲授  
上選卒負才不售賫志沒於家

詹一鶚號綠野邑廩生沈雅淵博舉修邑乘而賦性純孝  
其父宗之乃叅政季子也暮年每憂產落鶚輒婉辭以  
解父幾百齡卒其長子世教負才名廉取樂施訓龍游  
歸不改舊風邑高其行舉鄉飲賓

潘伯廣字子居爲人斷決有謀才幹過眾先是學宮圯議  
修葺屬董其成隆慶間纂修縣志傳記多所裁定癸巳  
舉鄉貢授福建政和訓卒於官

詹世宦邑廩生才宏學贍兼善草隸遇得意作輒自書以  
遺人隆慶間修縣乘與其事焉

松陽縣志

卷九

人物

文學

六十

毛元淳字還樸得庭訓幼讀書卽有志聖賢學手濂溪陽  
明諸集講求不倦棘闈屢蹶亦無悶容輯尋樂編爲錢  
塘翁一巘盟社深賞訓新城尋補會稽諭劉念臺一見  
器之命主稽山講席著日新錄秩滿歸囊篋蕭然唯贈  
行詩章盈帙而已邑以德望推鄉賓壽七十三

徐學禮字仲立事繼母盡孝友愛兄弟讓產却金性竒敏  
爲文每於傳註外出特解何賓岩先生高足也一時學  
使郡邑大夫稱之丁酉選貢以研究積勞卒於京邸同  
年趙無聲經紀其喪惜未展所蘊云

王用賢字任卿卓犖磊砢博涉羣書善臨池試千餘言可立就其友以屢困文壇爲耻用賢厲聲曰文壇奪幟我輩事也且松故才藪奈何以偶蹶短氣己酉秋幾入穀以溢幅點額諭樂清授台州聞國變辭歸甫浹旬而卒劉金號西澗嘉靖間貢歷教職一十八載素守淡泊簡易廉介廬舍頽敝遷漢陽教授以母年高遂告終養徐貞明邑庠生貌莊品粹學問淵博尤善書法與修縣乘頗盡公憤

潘國俊號起岩以謙自牧以和處衆克守乃父元詔之訓博涉經史從遊者甚多應萬歷貢優游自樂子孫相繼

松陽縣志

卷九

人物

文學

六一

賓興識者咸以爲忠厚之報云

王思卿字調元襟懷曠朗落筆雄宕嘗集邑博學鴻儒辯論六經四予業得意時自謂直悟聖賢心胸天啟間以明經訓西安尋諭富陽邑中人士莫不典型之

毛復號心庵明敏博雅厭習舉子業與傅光前先生往復闡太極奧旨先賢雪庵公孤忠湮淪力白遺事呈請建祠至排羣議復學宮舊址倡義樹碣表識遺墓義舉不能殫述所著有避色錄耦耕集藏於家

詹仰佐字國徵操行方潔崇禎間貢授義烏諭未幾告歸輿情重之每推鄉賓古陽致仕御史張公贈以四語云

學探淵源義起著績志脫塵凡名馨千古

詹加新字象鼎幼稱神童舞勺食餼博極經史諸書胸襟磊落不循世法至排紛難散千金弗惜因赴貢卒里人痛惜之

葉永華字玉果蚤慧博通諸藝有倚馬才崇禎丙子登北榜賢書對智勇策近萬言主司黃太穉先生射覆曰此必名士曉揭果與揭重熙王宗熙稱海內三奇司成倪鴻寶先生謂其文骨峻嶒必能任天下事延入西席每與論經國大事著藕孔集讀書日記續河圖衍義諸書未幾以讀書勞瘁卒

松陽縣志

卷九

人物

文學

六一

王思才字輔元少勤敏好學善屬文場屋數奇絕不介意飲酒集友淡然自樂卒後妻陳氏賢淑已無出撫庶子如已子

葉瑞春號芳寰篤學寡言以明經授德清訓閉戶讀書轉諭分水雅意作人所餘俸資卽以修學宮賑貧士歸之日士子遮道泣餞不忍別

徐鳴時號紹溪性慨爽好學居鄉訓士有則一時俊選多出其門墻萬歷間貢未仕卒

毛維聖字時甫幼失怙敏捷善屬文孝友性成弱冠食餼爲叅政李公叔元所器應崇禎貢授上選懇辭赴科終

於京邸時論惜之

葉芳萼字伯開少好學處家庭以孝友聞早歲食餼持己醇謹淹貫書史遊其門者甚衆屢舉德行著西崑集

葉正字書升淡泊自甘好學砥行一介不取士林中之雅淡者

清

丁日昌號寢明乙酉明經敦厚慨爽博洽羣書與人交周摯有禮人樂親之修文廟不辭勞瘁建尊經閣殫力料理齒漸高藝圃植花延老友酣嘯自適人勸之仕輒云五斗米豈易我嶺上白雲也壽七十二訓子皆遊庠

松陽縣志

卷九

人物

文學

六三

劉邁英字卓侯上安人邑廩生治家嚴肅燕居無惰容讀書手不釋卷博涉經籍精於易著易經解義詩文雄健有奇氣邑令劉公贈詩獎之

丁正中字上卿城南人朴誠謙雅善屬文尤工於詩爲廩生聲譽藉甚及貢太學文名益著授山東嶧縣丞以年老辭不赴任所居有素園種竹蒔花與諸文士詩酒盤桓著素園詩集年至八十六

葉鰲字魁英由歲貢選訓導博學多才以詩酒自娛所教學率多俊彥

吳國玖字文石周安人邑廩生乾隆庚午恩貢侯選教諭

性廉介貧而能守掌教明善書院垂十餘年門下成就者甚衆歷任邑令皆重其品有某爲人所訟餽遺以私之冀其言以伸已致力却之其操守類如此讀書有根柢屢赴棘闈薦而不售益篤志好學年雖老手不釋卷楊友桐字鳳棲白岩人天資聰穎幼卽能文年十四入邑庠試輒高等文章矯健尤工於詩所至多題咏稿成復竄改或依韻更作他日又復然以此詩益工乾隆庚辰歲貢例選訓導未官而卒有子六人設家塾自課五子均遊庠克紹家學

許萬青貢生字穎選城西人髫年嗜學性耽清雅築綠水

松陽縣志

卷九

人物

文學

六四

園日與諸文人飲酒賦詩倡和成集除蒔花種竹之外從不干外事人咸羨其雅量高致焉

包旭玄字世卿城西人由郡掾捐選經歷喜讀書每與文人學士爲詩酒之會竟夕哦咏典則富麗諸文士自以爲弗及也順治初溧陽相國陳芝山公諱名夏未遇時客栝蒼因世卿能詩訂交旅寓遊三巖作記書扇以贈臨別又贈以序詞曰余於世卿蓋友之矣并贈詩曰空谷人來可定交相從載酒付僧巢目前窮達皆兒戲天下山林少客嘲屢汲流泉松火怒漫登小閣竹風敲君毋自愧非儒業誰識千旄在浚郊其相引重如此康熙

己亥相國孫陳世超來宰松邑求遺墨題詩其後宣平  
令晉陽雷仁育錢唐進士黃大齡孝廉何又爽袁珏皆  
次韻和之重相國之文抑以表世卿之風流蘊藉云  
劉傑邑廩生字漢元界首人讀書好學善屬文試輒高等  
尤工詩賦著吾廬文稿節載藝文貧介自守足跡從不  
入公門儒學胡雅重其爲人舉報優行第一督學李廉  
得實以學優品重四字獎之

丁嗣任邑廩生字又尹城南人恂謹自守胸有涇渭善屬  
文累舉報優行擢高等父瑗喜留心當世之務自風俗  
沿革職官乘除具有筆記嗣任曾據修邑乘焉

松陽縣志

卷九

人物

文學

六五

丁植優貢生城南人才品純正著有詩稿阮芸臺中丞聞  
其佳句檄儒學索呈全集適己人亡稿失

蔡士梁字東橋品端學粹工書法掌教明善書院士林重  
之

潘益恭庠生字謙谷工詩畫游幕江右聲名遠播

葉叢蕙廩生字君瑞教授閭里高足有登巍科者

王玉汝廩生字小扉家貧力學著有墨竹山房詩草

葉方暄邑庠生字岳松瑞應里人少孤事母孝博古通經  
受業數百人多成名著有四書單字解六卷子景適爲  
名孝廉著述亦富十三經題要經解尤覘實學次子佐

清任永康於潛教諭士民立去思碑焉

蔡懋功邑廩生字華城博學通經史闔邑推爲碩儒

蔡懋建歲貢生字午山學有遠識執經者衆

蔡懋中歲貢生字東閣文品兼優書法得古趣

詹巖歲貢生字巖山夙具慧才字法精妙瘦硬通神有張

### 桓王筆意

葉暘暢邑廩生字梅塢能文善隸書工詩賦

孟居仁邑增生字春原工詩文善畫山水名振江浙

周起芳邑庠生飽學有識澹於名利終日手不釋卷

沈昌邑廩生字亦農文思敏捷工詩古試輒冠羣著有墨

### 松陽縣志

#### 卷九

人物

文學

六六

### 香草堂詩稿

葉靈芝邑庠生字聖瑞好學不倦性嚴毅不徇流俗

鄭文光邑庠生字愛古孝親嗜學教授有方不干外事

丁寅附貢生字虎侯謹恪能文咸推老成典型

以上舊志

周聖教字式昭城北人恩貢生就職教諭邑侯江思濬聘

爲明善書院掌教生平孝順友恭不違庭訓詩賦文詞

克承家學具希聖之淵衷矢凌雲之高志五試鄉闈不

售庚午科省憲覆檢落卷選入敷文書院肄業

饒慶霖原名秀斌字若汀城北人幼聰慧性孝友未冠補

弟子員旋食廩餼設帳城西徐花園從遊日盛春風化

雨培植多才十餘年間歌采藻賦鹿鳴膺選拔捷南宮  
者指不勝屈如葉維藩葉文田潘步賢尤及門中之矯  
矯者生平究心經史作文尚清真讀書多創解明鼎雲  
學士羨其才華延爲西席端木太鶴先生魏苻汀葉梅  
生明府吳榕疆孝廉輩欽其品學引爲知友自是文藝  
益粹聲稱藉藉名溢都門遂於甲午北闈名登賢書惜  
六試春官屢薦不第晚年尤究心於先賢語錄裊躬謹  
飭不愧一代經師邑侯湯竹筠聘課子姪復請掌教明  
善書院主講幾三十年丙辰揀選知縣適洪楊餘黨竄  
入松境在籍籌辦團勇及寇去又辦善後各事宜舉凡  
院殫精竭慮日無暇晷著有消夏錄五卷五經經義附  
註二卷分類試帖四卷壽至八十而終

葉佐辰字瑞蓀號肖松古市人生而岐嶷八歲能文有神  
童之目十三補博士弟子員逾年食餼三十舉於鄉文  
名噪甚乃公車屢躋僅挑取謄錄二次籤分雲南知縣  
改名景適字溘夫往來齊魯燕冀間門弟子多顯者如  
湖州沈家本山左李汝霖魏迺驤皆一時顯宦自燕市  
歸來掌教青田書院及門若葉枝玉姚希善又皆歌鹿  
鳴而去學問文章爲吾松數百年唯一之人物讀其遺

文試帖以及散見雜著千鍾百鍊火到功成著有十三  
經題解平聲仄聲千字文書法尤工所遺楹聯屏幅卽  
半紙零縑得之者咸珍逾拱壁生平篤於內行割股療  
親事詳府乘尤不僅學問文章足爲後人矜式已也  
潘承如字受謙邑庠生城南人學問淵深作文有奇氣設  
教於家成就者眾所著有自怡齋詩草

蔡懋烈字松樵例貢生城東人性好學精岐黃志氣慷慨  
著有培蘭山房詩草獨建尊經閣倡造東鄉天濟橋捐  
腴田爲久遠計邑人至今頌之

蔡士烈字又英思步人增廣生學問淵博文藝華瞻設帳

松陽縣志

卷九

人物

文學

六八

授徒從遊者眾每與諸生講學必正席端坐其動必以  
正如此知府雷給以匾曰教思寬厚

蔡大來字交際思步人歲貢生學有根柢嘗爲明善書院  
主講誠心教導英才崛起屢赴棘闈薦而未售晚年益  
篤志好學手不釋卷

蔡增政字玉齊思步人邑庠生天資穎異詩字俱工作文  
數千言立就文宗馬給以匾曰篤厚超羣

詹偉字棲霞邑廩生城東人善詩文工隸法屢試優等士  
林重之

楊光卿字君恩號五之玉巖人附貢生咸豐浙闈君子惠

而不費五句題堂備簾官許評云以大學作主却好十章皆供驅遣而按之題旨仍復一絲不走主司加評曰大學作主運用細切次三亦穩稱詩妥惜以額溢竟作滄海遺珠性仁慈地方公益事尤慘澹經營勇於倡率遇荒歉必買穀平糶雖虧折不恤壽六十有三子志熙郡增生

陳其福字東生歲貢生城南人學問淵深字法挺秀秋闈歷薦不售設帳數十年從遊甚眾生平著作不少性耿介有卓然不羣之慨潘宗師嘗以品端學邃額其堂

潘益濤字之江歲貢生城南人品端學粹精文藝工詩賦

松陽縣志

卷九 人物

文學

六九

下筆千言倚馬可待開天香講院造就後學五十餘年門下數百人如進士高煥然舉人高斐然拔貢許作舟皆其及門也晚歲雙目失明而從遊之盛仍不減於昔日惜不得志於場屋僅以舌耕終老年七十九而卒著有天香詩稿然雖不遇於時而冢孫慶瀾鄂北首義爲國捐軀列祀忠烈祠榮及家族人咸以爲忠厚之報云蔡津字問源恩貢生城東人德行內優才華外見豪放似劉伶松陽儒學王賡華器重之命子受業惜文章憎命堂備薦卷數次不售尋卒子世澄學通中外尤知名王昌期字恭壽廩貢生才識兼優學養功至性廉介淡泊

自甘恪守寒素家風屢試秋闈堂備數次不售舌耕餬口從遊皆知名士滿門桃李一時稱盛

葉炳文字日光歲貢生大嶺頭人穎悟特達學有遠識尤工楷書

葉葆初字復夫號小岑歲貢生授訓導文章詩賦卓犖紆餘清真雅正兼工書法精究靈樞素問甲乙難經等書然不以醫傳非至親密友不肯輕試其術而妙手回春應手輒愈亦可謂醫中之高尚矣

毛飛渚字少洲恩貢生南山人生平造就後學桃李滿門援例就職光緒十年委署永嘉縣學教諭時已八十有

松陽縣志

卷九

人物

文學

七十

二而先逝矣

楊光舉字鶚薦孫蘭第五子歲貢生讀書好治經熟盲左尤深於詩歲試題入曰伯夷一節取材葩經陳宗師賞其文選付劄劂爲士林法秋闈題貧與賤六句取材盲左房官薦其卷曰三藝俱藻采繽紛主司李文田批曰作者煞費苦心奈楊意雖逢而數奇不偶僅以一薦報罷設教卯山十餘年門下多知名士曾舉爲本區議長享壽七十有九

楊光垚字巍然孫蘭第六子歲貢生候選教諭行文尙王尤體歲試使諸大夫國人皆有所矜式題吳宗師批其

文曰口吻宛肖可謂名下無虛浙闡觀過斯知仁矣題其警句云疇修己而未免疚心疇孔壬而自甘失色簾官稱賞呈薦主司徐致祥批曰工麗之至非有才者不能乃以額溢見遺閉戶讀書一生不干外事享年三十有六不竟其業邑人士甚惋惜之

葉廷琛字獻其玉巖人廩貢生家貧事母至孝性醇樸文思敏捷穎悟好學至老手不釋卷設帳古市朱文公祠從遊多知名士每課改文不隔宿講解娓娓學者感之葉鳳梧字碧棲玉巖人歲貢生天性醇厚事孀母菽水承歡友兄弟棣華媿美善屬文工書法親老不忍遠離以

松陽縣志

卷九

人物

文學

七一

致雲程莫展里人每爲歎惜

高大璋字永長增廣生象溪人家貧好學幼爲牧傭掛角讀書卒得名筆耕設帳及門頗盛子培舟字方之家學相承屢試優等食廩餼廣授徒門下有登科甲者並能樂善曾爲地方創設義渡至今行人賴之

蔡鏞字序東城東人恩貢生工詩文善書法邑人士咸欽仰之

蔡育賢字思齊歲貢生城東人秉性和藹不修邊幅好讀書善書法嘗慕陸放翁之爲人雖酒肆茶園求書輒應從游者亦甚衆焉

徐建猷字徽齋邑庠生東里人以寒素儒生爲歷任學官所器重設帳授徒問字者眾麗水宣平亦有遣子受學者尤能急公好義如整頓保嬰局修理文昌宮重新孔廟刊送善書皆力襄其事並將館穀捐助亦寒士中所僅見者也

闕進階字萇生邑廩生茶排人品端學粹幼卽能文善詩賦尤工書畫童年入試屢列前茅士林咸器重之年二十四而卒

闕起芬字韻蘭廩生茶排人立品端方好學不倦博覽羣書工於詩古試輒高等惜未展所施而卒

松陽縣志

卷九

人物

文學

七二

吳春澤字沛然赤岸人歲貢生家貧力學設帳二十餘年清季興辦學堂邑侯葉昭敦稔知其學行派往日本考察學務回國後成立毓秀高校充任教員旋溫處學務處長孫仲容聘爲學務調查員未就任本邑勸學總董民國紀元任參事旋辭職歸其爲學勤奮過人一以義理爲主兼事考据凡五子近思錄閻氏四書釋地補編陸氏毛詩草木鳥獸疏朱氏說文通訓定聲等書頗爲宣究文法韓歐兼取藍鹿洲詩主性靈多比興體字初學顏繼學歐晚年又仿魏碑瘦勁有神著有勤補拙齋雜文及詩存其教學生嘗曰讀書所以明理窮經所以

致用及門如劉德元等多一時知名士子朝冕侄朝鼎尤特出冠時享年六十有九而終

包庭芝字商山歲貢生橫樟人胸襟瀟灑氣宇軒昂其文筆之雄健簡古罕有其匹歲大比屢薦不售養晦於石倉間教授生徒迨科舉廢學堂興聘爲毓秀教員民國二年設立孔教分會舉爲副會長戇直之態老而弗頹同會咸推重之

周肇洛字敬休號菘甫高亭人恩貢生候選直州判樸實勤懇道德冠時有古大儒風家貧力學范仲淹斷齋畫粥莫以過之楊楸菴稱其能讀三墳五典八索九邱民

松陽縣志

卷九

人物

文學

七三

元以來尊崇孔教信道尤篤每逢聖誕慶祝大祭必徒步行百餘里而來嘗曰至死方休果於癸亥八月因病不到九月中旬卽噩耗至矣惜哉享壽六十有三

葉秀庭字槐三恩貢生城西人天資聰穎文筆清超從遊甚衆一時知名之士半出其門且秉性慈善邑有善舉無不踴躍樂爲如整頓保嬰局出力尤多邑侯劉靖贈以功存保赤匾額獎勵之

葉高崧字冲鶴城西人拔貢生天資秀異工書法遠近聞名日本宏文學院畢業詣京師應袁總統嫡姪世傳之聘教讀數載保舉山西綏遠縣知事未及赴任而終

人物志八

尚義

宋

潘好古字敏修入成均與名士游值歲饑傾廩濟之洪水至好古與同處者數十人諭舟人先濟餘人舟人曰吾德公故冒險來好古曰濟彼猶濟我也鄉人義之

王灌乾道中以賦役繁重首創義役役先後視籍田多寡視等行之三十年而訟不抵於有司

楊大同素業賈寓武林邸舍忽聞鄰哭甚哀詢之乃王尉失囚獲罪鬻女以贖故相泣別大同遂出資以貸尉他

松陽縣志

卷九

人物

尚義

七四

曰大同婿遂昌鄭克寬登進士調鄂州監酒時鄂守卽王尉也克寬以公事侯門守覺其鄉語類栝問曰識楊大同乎曰妻父也守曰尚在否曰卒矣惟妻母見留此守曰汝爲我迎楊媪來至則坐媪於堂率子女羅拜於下以母事之因語其故置克寬於幕以薦之

程大雅字正之素尚義遇歉嘗捐廩以惠鄉鄰積雪起視鄉鄰不火者密以米置之門雅古籍二都助田三十畝以資都役人有鬻妻兒者以財帛周之其人以荒山一區爲報大雅收以葬親卽今五龍搶珠地也後子孫名登顯要人以爲陰隲所致

明

吳亨性倜儻尚節義洪武初以浙東副元帥石抹公命出資財築處州左渠城五十丈後洪武十四年縣西橫源山民倡亂縣帖下亨率鄉人逐捕其黨閭里咸賴以安繼又出私帑造船於本縣金梁烏石二渡以濟行者鄉人至今稱焉

劉原熊世爲蛤湖人父惟賢徙居澄川捐資倡築獨山百仞堰建永安橋置澄川渡立祭田以祀先修德行誼遐邇具聞正統間陶得義等倡亂松之男女多避於橫山寨寨近澄川守寨者素聞原熊剛毅各捐簪珥求爲禦

松陽縣志

卷九

人物

尚義

七五

護熊却之曰賊因財而致亂予復因亂而受財相去幾何卽椎牛注酒集鄉人原熊執殳前戰賊懼退居城北夜有携妻子東逝者賊知次日乘機刦寨原熊又掖兵戰於野斬賊魁四級熊亦力戰死鄉人哀之祀於社包麟字天祥以貢授羅源訓導先禮教而後文學人多仰其高誼時羅源有賊刦庫宰乘夜出逝麟主庫收籍其餘篋封識無避嫌人亦信之歸老極貧一日忽沐浴辭親族而終

潘伯槐號平川孝義性成樂營美事初縣令楊公以五尺橋壤行者苦涉槐捐資築之縣具匾曰尚義建橋其族

祠堂歲久而毀念子孫風雨皆有所棲而報本之地獨無覆庇卽捐金壹百貳拾兩倡建復撥田供祀

葉傳字南岳邑庠生倜儻多豪舉其兄伸緣事忤令令具伸傳適遊學於省自負年力改伸爲傳代褫及兄尹儀真絕不望報解推惠人無德色受者罕識其面子選功鬻產以教子孫有父風

葉應麟號賓川爲人有介性讀書務明大義由鄉貢授昌化訓講學端本澄源一時推爲文宗會縣宰峭刻不情仇疾諸士通庠將詣府愬之公適由府回道遇諭之曰虎雖可搏當戒傷女盜歸吾自有說宰聞感登門謝過

松陽縣志

卷九 人物

尚義

七六

遂改行遷分水諭尋告致歸

潘元榆字養性爲人慷慨尚義家範嚴肅萬歷間縣大荒多疫榆爲煮粥待饑復買藥餌延醫以療沉疴活者無算今子孫昌衍時以爲陰德之報云

毛翽字漢舉善鼓琴弱冠董築和仁橋程石鳩工不煩而事集伐木作室有竊而藏於水南之港其隣具以告翽恐得實則暴竊者過無以齒鄉曲潛令移木方徃視竟蔽其醜每春耕里有不能播種者命僕携苗協之五子皆成立四子鳳階端方靜雅爲一邑典型惜未展所學而卒

潘元寶字天球慷慨好義人有以空田虛契售銀殯親者  
卽應給之後知其貧無措遂焚券嘗施米賑邑中無告  
者貧人德之壽九十三

丁芬字新吾邑庠生居貧好義憫人艱涉倡造赤塔橋改  
建文廟殫心力以營助遇人有急排難解紛又助貧喪  
兩嗣得明經焉

葉德佐字廷輔少孤家貧事母至孝天性長厚不侵然諾  
好施予恤緩急不責其報內行尤愷不取非義不視邪  
色日惟課子誦讀勉以忠孝廉節爲本不圖溫飽以故  
子元芳令崇義有聲蓋得於庭訓也

松陽縣志

卷九

人物

尙義

七七

詹應霆字體震布衣能文纂修家乘爲府掾時有無辜受  
冤者府尹欲置極刑霆爲力白乃免斯時尚乏嗣忽夢  
神告曰汝能活人陰隲不少錫爾子且賜爾程後任雷  
鄉親見子孫食餼壽至耄

劉德傳字克繼天性孝友尙義恤貧鄉鄰有不平者一爲  
居間無不釋然或經訟公庭片詞和息以故縣令漳州  
張公無錫周公尤加禮重子燿以貢授泉州通判崇禎  
初封如子官

孟師曾字省吾邑庠生好義樂善救人急解人紛捐資修  
路造石佛嶺上茶亭又撥田五畝捨其租每歲於嶺上

施茶三月以濟渴行人誦其德焉屢舉鄉飲賓

周繼宗字德軒少孤篤志孝行懿秉天植雅慕古人邑兩舉修學董事唯勤且建橋梁焚借券掩骼還遺煮粥起殍種種善行列諸旌善亭

毛有常字維德守正不阿早失怙事母孝撫三弟同居身無私蓄濟貧憫凶有焚券還遺助葬種種善蹟閭里稱之至捐資董事鬻宮獨任修祠俱人所難能云

葉廣俸號倫泉性至孝好施樂善捐資買山爲義塚以與貧無葬所者院道旌獎列名旌善亭屢舉鄉飲壽八十七

松陽縣志

卷九

人物

尙義

七八

毛鳳寶爲人慷慨好施癸卯建學捐資力助更有施粥焚券種種義舉難以殫述其子汝達克承父志亦助建學好施不倦

楊秉彝號平舒正經間納穀壹千貳百石奉勅授七品服俸建祠祀祖其勅旨及像見在宗祠可考

高慶童號仁一正統間歲大饑慨出稻穀二千二百石用助賑濟有司以聞奉旨特賜獎諭勞以羊酒旌爲義士仍免本戶雜汎差役永世尙允蹈忠厚表勵鄉俗用副朝廷褒嘉之意欽哉故勅等語至今子孫繩繼奕葉簪纓咸謂忠厚之報云

詹立敬號懷野吏而通儒任宜興鍾溪巡檢建五洞橋與  
周內閣尊人飲酒賦詩相倡和逮授松溪尉內閣爲制  
錦贈行見松溪西門外水漂骸骨遍野買義塚以埋之  
仍造松溪橋捐俸鳩工又鑿井暨諸惠政松多盜敬單  
騎往撫諸賊皆感泣解黨遂擢主簿松人勒石建祠至  
今祀焉歸鑿石修青雲嶺路捐資建獨山橋往來義之  
徐毓秀字振屏早失怙遺腹事母孝種德尙義修路施棺  
急公建學樂人爲善通庠舉以賓介捐資建祠以報祖  
德享壽九旬院道旌獎子雲蛟亦善繼先志捐資助學  
身董其工不辭勞瘁

松陽縣志

卷九

人物

尙義

七九

毛汝芳字春寰少力學補邑弟子員天性孝友與兄同居  
每食雖蔬菜必親送之寒則奉衣疾則調藥兄弟相好  
至耄不倦妻父耄年無嗣遺以金不受卽爲之置一妾  
得二子時人咸誦之見利思義汝芳有焉

劉應雷號少塘慷慨好義喜爲人解紛難邑建青蒙塔上  
鄉勸募皆一力獨任又倡造舊市三角壇大橋里人德  
之年已古稀給冠帶兩爲鄉飲賓宋同知劉定言其先  
世也

潘國薦號冲寰親賢好義業儒不就在京有麗水赴選者  
疾卒無所歸出資殯攢同邑王貢生疾資斧乏薦多方

調理及不起代置棺衾携柩歸所費不責償里人義之授廣西恭城尉院道獎其弭盜有方轉陞白水巡司辭歸不赴壽七十三

徐學韶字景舜少遊庠孝友好施捐創宗祠設田供祭建橋埋骨歲荒出粟平糶鄉人愛敬如骨肉壯年失偶不再娶子新化克承父訓爲時名士婦毛氏尤極盡孝韶年八十三事至四十餘載相夫奉甘旨靡間韶疾劇新化奔走醫藥氏割股籲天遂少甦宗族里黨請揚之韶亦力疾陳情署篆郡佐葛公造廬嘉歎韶始怡然長逝徐自新字元白性洒脫居家淡泊與人交無貧富凡有托

松陽縣志

卷九

人物

尚義

八十

者視事若已忘身赴之又多才藝善針灸醫藥堪輿等術所著醫案神針論補有回生妙手壬辰冬有僧雪如病篤求診會大風雪往救之得活途歸冒寒卒年七十葉以爲字邃修邑庠生貌魁偉性慷慨好義遇善事喜爲不倦借貸不計利更愛友延賓畧無怠色

徐兆佐字魯卿邑庠生天性孝父疾篤家貧不能藥跣足拜禱於方巖徃復三百里裂趾忘痛苦父獲以痊渡石牛解衣與人救覆舟人曰舟中有與君戚乎佐曰人溺猶已何必戚而後救也人負慚嘖嘖高其義

吳以朗號碧陽慷慨尚義置買正念寺田跋入學宮修理

邑士德之舉薦鄉飲介賓

徐子祥號仰屏尚義好施有孝行表率鄉閭居南洲隔河  
建一庵每歲炎天汲水煮茶以濟渴往來人德之壽至  
耄舉鄉飲

清

潘延洙字聖源弱冠登庠讀書不問世事丙戌夏妻毛氏  
產厄會潰兵數萬至男婦盡匿洙夜負妻至河村尋卒  
苦哭兵至獲洙着引入山至男婦避處不從洙引刀自  
殺避難人藉以獲全均義而感之

何宗璽字廷信好義樂施捨田建赤塔橋渡助建中洲堂

松陽縣志

卷九

人物

尚義

八一

以濟行人憩息壽百餘冠帶榮身旌其門曰高年耆德  
何讓字德美爲人梗直有爲善理財樂成善事同弟誌均  
壽九十餘子孫蕃昌人皆誦其盛德所致

何伯仕號泰岳年四歲失怙母葉氏誓死撫之成立生平  
好善樂施助學建橋遇歉歲慨然出粟以濟鄉隣之困  
邑令聞而獎之舉鄉飲固辭壽七十五

戴日康字國泰本籍金華遷居松邑城北有膽識順治四  
年洪舜寇松縣令脫匿洞陽觀遊府陳發兵捕勦洪舜  
退屯白巖日夜劫掠陳疑有爲寇暗作間諜者民情洶  
洶日康謀於所私曰此事非縣令不濟然勢急矣但使

印信尚在可爲也乃潛入縣署於三堂匾額上搜得之遂出安民告示蓋以縣篆又密遣人急迎邑令從後衙入出堂見遊府力剖無間謀事松民賴以安堵

詹儒熊字渭兆城東人庠生康熙乙丑松邑饑斗米四百儒熊捐米貳百石設廠煮粥族隣有產女欲溺者儒熊知之急令婢抱歸撫爲己女備粧奩嫁之人有借貸靡弗與或久逋欠果無力者輒焚其券義聲藉藉生平敦厚謙讓不履公庭年至七十歲

劉廷英字殿侯上安人貢生生平好施與康熙五十二年舊市江進源以負債鬻妻哭別甚哀廷英偶過其門詢

松陽縣志

卷九

人物

尙義

八二一

知之代償聘金以理遣娶者六十年劫後徐正利亦因貧鬻妻已就道廷英追回贈金復全其夫婦兩家至今德之其餘恤飢寒施棺木貧乏者歲受其惠義聲藉藉著鄉里

詹廷韶字又善城東人庠生友愛兄弟最篤生平多義舉二十都有程某者貧鬻其妻韶贈金使復完其夫婦雍正甲辰春有丐者十餘人以疫死於舊學基傍神廟中韶 棺埋之鄉里競高其義

劉時信字希賢小槎人束修自愛富而好施捐造橋梁修砌路道掩埋遺骸義聲藉藉郡守黃公邑令連公孫公

黃公皆給匾獎之乾隆五年舉鄉飲壽至九十一  
周繼開字隆盛高亭人凡里中公事知無不爲助修學宮  
及邑志建祖祠造濟川橋其餘升斗之惠不可枚舉捐  
社穀參百石給頂帶榮身撫憲莊公書匾旌其門曰善  
足型方子四人克承父志孝友之名著於鄉里  
徐有朋字三友山甫人爲人豪爽好義助葺學宮修砌橋  
路多不惜費見貧乏者輒憐恤之或有逋負無償卽焚  
其券乾隆戊寅歲捐社穀壹百貳拾石藩憲明公匾其  
門曰惠施粉榆年至五十有子六孫十三長子庠生成  
章讀書嗜學人以爲積善之報

松陽縣志

卷九

人物

尙義

八三

郭仲鮑字恒宇閩省仙遊人占籍於松慷慨多義舉捐捨  
棺木掩骸埋龕歲費數十餘金乾隆庚午松邑置社倉  
仲鮑捐粟伍拾石人咸義之

葉逢澳字衛川王村人監生居家孝友好義每歲施丸散  
以濟人造石角渡船建屋渡口以居司渡者行人利之  
乾隆戊寅歲捐社穀壹百石藩憲明公以匾獎之

葉又英字聯芳城西人邑庠生天性孝友兄弟八人英居  
六家務皆英綜理門內和睦無詬誶聲生平不涉訟公  
庭猶樂善好施雍正壬子捐修五木庄橋樓及沿溪大  
路子芝漢克承父志十四都力溪庄沿流田屋屢被水

患乾隆辛巳請於邑侯景公募築捍堤五十餘丈勸輸董理芝惟一人肩任之堤成洪水不復爲害人謂其雅有父風焉

蕭啟潛字雲際城南人康熙辛丑松邑災歉濬捐米百陸拾石煮粥以濟雍正庚戌建十八都觀山橋駕屋其上費數百金人無病涉并得憩息之蔭邑令孫薦飲賓筵旌其門曰視民不佻享年七十一而卒

余士元閩省仙遊人康熙二十四年尋父至松因家城西歲丙戌松邑大災米價昂元減價平糶里人有鬻妻兒者給粟完聚死而無歸者助之以賻松人咸德之

松陽縣志

卷九

人物

尙義

八四

葉奇字克幹邑庠生爲人沉默儀度修整與人交和而能介家產雖微好爲義舉見遺骸輒付金收葬之捐社穀墾義田乾隆己卯巡撫莊給與人爲善匾額旌之

徐之熹字忠侯儒行坊人候選吏目性豪邁諒直房姪某幼失怙恃熹撫養於家比長爲之婚娶歲戊寅建設社倉慨捐穀伍拾石城西門樵樓頽及育嬰堂圯併築橋造渡皆捐金竭力以勸厥成生平好義行善綽有長者風當道每嘉旌之子絲綸貢生克繼乃父風人謂喬梓繼美云

詹顯儒字握玉城東人由邑掾考授從九品天性孝友事

父母克盡誠敬昆季分爨後或有不給輒輸已資與之  
每歲除夕鄰里有貧乏者酌遺米肉收債不索利或有  
逋負且焚其券乾隆甲戌邑東南火傍舍皆燬儒屋居  
其中獨無恙人謂爲積善之報云

葉成發國學生天性純雅樂善好施屢修橋路行人德之  
乾隆庚午捐社穀邑侯吳給匾旌焉

李起俊舊市人樸誠自守以飭躬植品率化鄉人人多式  
之性篤本源其先世無宗祠俊以獨力建宇撥田爲祭  
享之資尤堪矜式

葉公愷字元友舊市人祖居卯山後植品端重處世謙和

松陽縣志

卷九

人物

尙義

八五

遇修寺院橋路無不首先捐助乾隆庚午松邑創置社  
倉倡捐穀叁拾石邑令吳旌給以匾

周斯盛字載錫城北人邑增生刻志讀書屢試高等有幹  
濟才雅意急公學宮圯壞倡議捐修總理其事賢勞持  
著以是品重膠庠

葉乾字爾健本籍麗水明洪武諡南陽侯葉琛之後至嘉  
靖初遷居松陽張山天姿英敏年十四遊邑庠文詞工  
雅善敦品猶樂施予乾隆戊辰歲饑施穀貳百肆拾石  
以周貧乏邑令陳給匾示獎以彰惠濟之美

張文學字步商閩人寄籍松陽爲人沈靜樂於爲義雖多

費不吝捐社穀壹百石復助修學宮及邑志在鄉里周濟貧乏人多嘉之

謝世貢庠生南溪人幼失怙事寡母最孝生平慷慨好施遇荒歉出粟濟鄉鄰之困凡修道路造橋梁有利人之舉靡不踴躍捐助人皆稱其好義云

蕭懋學字敏來邑貢生雅好讀書樂與當世名士質辨疑難學業日進雖累試棘闈薦未獲中猶刻苦自勵且振貧濟乏義舉交著里人樂步其後塵焉

饒士芹字忍齋城北人慈祥公直有幹練才曾爲邑功曹出納持正歷任諸邑侯咸倚賴之平日排難解紛樂行

松陽縣志

卷九

人物

尚義

八六

善事每多隱德子慶霖以名孝廉作本邑山長數十年科甲廩附半出其門同治甲戌例得重遊泮水孫曾濟濟亦各有樹立焉

蔡懋昭字東璧附貢生城東人天性孝友親病刲臂以進撫幼弟三人各成名有出仕爲縣令者生平慷慨有大志每遇地方要公必爲首董歲大旱倡捐散賑邑侯以仁施利濟置匾旌之復首捐社穀二百石府尊以爲善最樂邑侯以邑有澹臺額其堂厥後興築城南河隄慨捐二千餘金工始告竣洵爲百年之利云

葉文蔚字豹巖附貢生城北人立品篤行富而好禮親族

通緩急皆立應有鬻以田產者卑其原數不較價且必以大錢予之凡如捐社穀修祠廟築橋修堰靡不首出多金以爲倡邑庠之明倫堂傾圯有年慨然獨任其費建造如舊制迄今春秋頒胙報之焉

潘學元號善長城南人生有夙慧性純孝以侍親疾棄舉業援貢加州同銜居鄉行善不欲人知祈雨主醮事卽沛甘霖識者服其至誠郡庠派捐修理銀二百餘兩獨力以任之府尊以急公好義旌其門咸豐戊午隨同張邑侯倡捐募勇防禦髮賊在界首陣亡年已六十有七事聞加贈知州銜建坊入祠長子煌以布理問襲雲騎松陽縣志

松陽縣志

卷九

人物

尙義

八七

尉其餘子若孫或登仕版或列鬻宮曾孫十數人亦英穎無庸品

宋永起楊家堂人起家勤儉世爲板業巨商贈助親友無吝色家中有壽誕不稱祝惟代完闔村錢糧以廣其惠每次計費數百金造橋修路猶其餘事壽踰八十而終子德煥克承先志曾孫亦純謹有禮

葉有容大嶺腳人周急濟貧尊師重道寒儒多感念之三子均入庠孫食廩餼世濟其美

蔡文熊字東侯例貢生城東人好施與樂善不倦曾倡捐社穀二百石邑侯江給匾曰惠濟桑梓又開通學宮前

西流水獨任工費學師鄒以從善如流額贈之

蔡桐封字其德石倉源人幼失怙事母孝謹以督理家政棄舉業就援按照磨生性慷慨見義勇爲地方有公舉捐助弗稍吝族友中匱乏者周卹各得其宜人皆以富而好禮稱之子庠生建侯建邦咸有父風

葉纘輝字含玉城北人家素封性儉約凡有公舉慷慨捐資無吝色故得議叙同知銜恤貧振匱里鄙尤感頌之子國良授光祿寺署正諸孫亦無凡品焉

葉瑛善醫設藥肆於門以待疾者而施之遠人輒留躬治藥餌必療而後去子濬承志歲稔積殫罄其庾粟叁百

松陽縣志

卷九

人物

尙義

八八

石出賑瑛曰而亦念溝中瘠將爲祖宗守墳墓鄉里稱善人吾可無憂矣人謂有麥舟之風郡守廉其事父子

咸舉郡飲

以上舊志

吳邦瑞字玉甫恩貢生橫山人有精明之識強忍之概生平處事不苟見義勇爲道光間汪大守嘉其爲人匾其堂曰好義不倦

闕天開國學生石倉源人爲人慷慨好施凡修造橋路殿宇莫不首出多金續修望松禪院慨捐叁伯金歲甲申修復社倉捐穀五十石邑令江公贈以視履考祥匾額先世由閩遷松未有祖廟倡議建祠慨出巨資又撥祭

田邑令劉贈匾曰光前裕後享壽七十有九

闕拱垣字香荷石倉源人九品銜生平急公好義家積微資不自封植慨出囊金倡造益慶橋併助田修理享壽八十有八五代同堂二孫遊庠

葉有海大嶺頭人富而好禮遣子肄業張芝壽廣文之門其時髮逆犯境恐遭蹂躪迎張於家避亂及髮逆退後又發粟濟人張贈以匾曰敦厚併爲之跋俾子孫奉爲矜式其子炳章邑庠生存心仁厚仍有父風村鄰向羅輒以滿斗與之尊師重道義方是訓孫作錢楚卿均遊庠

松陽縣志

卷九

人物

尙義

八九

林福元字元日五合圩人生平好義舉樂施與釣魚嶺兩傍手自種植松木護蔭行人又獨置港口渡助渡田拾畝有奇以爲渡夫工食享壽八十有三五代同堂奉旨旌表欽賜頂服緞疋銀兩給予七葉衍祥匾額以褒揚之

高永繡字篤斐象溪人邑庠生精醫理家小康贈醫施藥性尤慷慨鄰里有貧乏者時周給之道光二十五年歲大稔饑民遍野出倉廩以賑濟之全活甚眾餘如廟宇道路橋梁無不踴躍捐修生平特殺不食每逢壽辰誠勿慶祝勿設宴計所費以濟人知縣湯景和親書以永

終譽匾額獎之享壽八十有四子四長肯堂次肯構三  
凌霄均遊庠季凌雲國學生生時有異徵人以大器目  
之乃七齡喪父又值髮匪之亂遂廢學勤儉持家樂善  
不倦卻有父風自以一衫未得課子綦嚴其子斐然煥  
然炳然相繼擷芹香領拔萃登賢書成進士出爲名宦  
處爲碩儒其門第振興科名鼎盛蓋有由也

葉以成字樂山庠生城北人望重品端富而好禮疏財仗  
義周急憐貧每逢歲旱則發粟賑濟其他如捐修橋路  
殿宇猶其小焉者也道光年間獨修學宮需費四萬餘  
元可謂有宏量而識大體者矣惜舊志未載幾乎湮沒

松陽縣志

卷九

人物

尙義

九十

不彰茲當續修爰補述之

葉學詩字聖誥玉巖人勤儉好施董建祖祠撥田五畝爲  
享祀資重建岱頭時思茶亭以憩行人道光壬午慨捐  
社穀壹百擔邑令江公贈君子有穀四字以旌之

徐旭初字杲東南州人例貢生咸豐季年粵匪陷松偵知  
旭初饒於財以僞命招撫如不出則將屠其鄉旭初爲  
地方計佯往投之至福建境始脫身歸鄉里竟免於難  
享壽八十一歲

湯世序字德齋呈回人邑庠生同治間經修本郡試院慨  
捐數百金工竣後知府吳給匾曰鋤經種德

楊元陽字承日大竹溪人乾隆二十四年栝郡歲歉慷慨樂捐救濟貧民郡憲嘉許之匾其堂曰推解餘風  
項振基大竹溪人心懷慈善見村外聳井地方路屬通衢時被山洪阻隔行人苦之遂節省八旬壽費獨建石橋以便往來光緒十四年倒塌仍經後裔修復

楊光揚字賡堂玉巖人國學生同治元年髮匪竄松間關跋涉請兵防堵袁總管獎以誼高千古何縣令額其門曰急公好義先是何方有積工貲置田爲保嬰局費何故後族某覬覦此產出而爭執局事幾潰揚挺身剖訴某技窮局始成立葉葵生廣文以實大聲宏稱之壽七

松陽縣志

卷九

人物

尙義

九一

十有一而終子遇春邑諸生孫枝蔚起循循有度

徐應龍字乾六玉巖人恩貢生敦詩說禮博極古今而尤周儻好義重建宗祠刊刻達生篇以救產母倡設保嬰局以拯溺孩種種善行里人德之

周遠寵字仲綏高亭人性孝友好行慈善光緒己亥歲饑獨傾私囊百里運糧計口分潤嘗語諸子曰當此粒米如珠慎弗昂價困人即少虧損毋較也子六長紹濂弱冠遊庠仗義疎財綽有父風其餘諸子亦均守父訓僉稱稿梓繼美云

葉肄三字宵雅附貢生自號康泉野人正直儉樸好爲義

舉咸豐十一年髮匪爲暴避難回家見白骨暴露心哀之購殯置骨謀葬於黃泉頭爲纍纍塚每念無保塚常產於光緒十九年倡議組織孤魂會捐撥田畝以爲每歲中元度孤加土之資晚年精神益健子孫振振享壽七十有五

葉佐邦字作屏古市塘岸人郡庠生佐清堂弟也咸同兵亂干戈甫退閭里蕭條劫後餘生覓食無門至死於鋒鏑者白骨拋散四野尤爲目不忍覩邦助兄採辦甌米設廠施粥以活災黎並協同集貲檢拾無主遺骸擇下街營防下處爲瘞埋所晚年提倡開築通澤堰灌溉良田不下千餘畝農田水利民眾稱便壽八旬有二迄今孫子濟濟人咸謂爲積善之報云

松陽縣志

卷九

人物

尙義

九二

李光泉大陰人性仁慈好施與每早起周視隣族見有不炊者輒與之以粟且術精扁鵲凡有延請者卽往診之概不受謝夫婦俱八十餘歲人以爲仁慈之報云  
湯日躋字含章呈回人附貢生好義樂善嘗捐田十餘畝入祠爲春秋報本之需捐銀叁百兩在杭建板商會館又獨造南山橋專修呈嶺橋光緒間捐義穀壹百伍拾担以備禦荒府憲蕭給以匾曰胞與爲心

蔡發根字魯才思步人幼失怙事母孝謹生平見義勇爲

地方善舉靡弗捐助隣里貧乏者時周卹之壽至九十  
二歲夫婦齊眉子孫繞膝

蔡世隆字興齋思步人世爲板商生平友愛兄弟析居推  
肥任瘠遇荒歉賑濟鄉鄰地方善舉莫不捐助壽六十  
九其子孫亦克承先志焉

宋企祁字杏菴楊家堂人附貢生性仁厚居鄉有聲望鄰  
里鼠雀之爭每得其一言而解因母病習醫久而益精  
活人無數有酬以金者均弗受辭不獲則以充善舉平  
居於教養二端尤其留意如創辦社會以備荒設立學  
校以課士知縣張獎曰化啟文明清季被選爲區議長  
松陽縣志

卷九 人物

尙義

九三

規畫公益不遺餘力卒年七十三

葉維恭字蘭豔高山人生平好善先是高山坳至橫嵐五  
里許均鳥道崎嶇行人裹足維恭獨任修砌竟成坦途  
人皆便之初患無嗣後娶室連生二子迄今孫枝繁盛  
咸謂修德之報

宋鳳飛楊家堂人庠生通岐黃之術性仁厚家有曬台每  
晨登眺見村人未舉火者輒飲給之如有疾病則兼爲  
醫治施以藥劑有怠惰者必勉勵之歲終於貧苦之家  
必稱貸之子莒封附貢生亦有父風光緒間本村興學  
慨捐鉅款知縣張以澤流桑梓額獎之

夏興芝魯西人性樂善光緒間倡捐建築本村萬年橋並修理道路其子士蓉亦有父風宣統三年倡造東源橋凡有善舉無不慷慨輸捐人咸謂其父子濟美焉劉美若佳溪人雲軒從子少負志氣忠義有膽識雲軒好行義遇事輒倚任之美若亦視叔如父一日因事赴郡城間道出宣平隨從至三港口篙師失手美若梟沒雲軒感其義相村下張公祠右隙地築亭以慰幽魂顏曰感義並置田壹畝捌分俾子孫世奉其祀

項聯芳大石人慨捐震東學校田拾貳畝捌分撫憲張以雅意培才四字額之

吳文君字岐山例貢生古市人捐入古市區立第一國民學校膏腴田捌畝光緒三十四年邑侯鞠公獎以急公好義匾額又捐入該校銀圓一百八十元民國八年省長齊獎給六等褒狀壽七十五而終

葉秀巖字品三莊門人例貢生生平好義有出嫁堂姊並外甥賴汝芳父歿無依招之同居給以衣撫之成立光緒甲申修官路由城北至黃埠頭止捐助貳百伍拾元丁亥邑令范祖義賢有司也因公賠累短欠巨款上峯議撤秀巖慨出資五百金聯合古市士紳葉永蔭等籌集三千金以傾贈之而挽復任創設古市保嬰局先出

多金爲倡又如永蓮堂關帝廟建在莊門者皆獨力成  
之其子孫聯翩入庠後先競秀咸謂德報所致云  
葉方琴號蔚如古市人國學生爲人言信行果性情剛直  
慷慨仗義樂於爲善如助田修橋使人利涉時逢歲旱  
多方賑濟以及施送棺槨歲費數百緡其尤著者修砌  
古市全市街道需費一千餘金熱誠公益人咸稱之  
黃紹桂字望生上院庄人增貢生歷署嚴州府學訓導淳  
安縣學教諭光緒戊戌夏郡城乏食知府趙亮熙開倉  
平糶黃出穀一千六百石爲助民賴全活趙知府以澤  
周仁粟額其堂

松陽縣志

卷九

人物

尙義

九五

葉章興字屋生吳弄人以商業起家生平好義如獨修鄉  
賢祠撥充五都區國民學校田十餘畝省長沈獎給澤  
被粉榆匾額以表其德蚤歲貧寒中年致富教子讀書  
次第采芹食餼登鄉榜皆親見之子孫繞膝壽八十餘  
至今獨建家廟輪奐輝宏亦鄉間所罕覩者

蔡建邦弟英賢均附貢生蔡宅人慷慨好施修橋砌路置  
渡施棺種種善行難以盡述光緒乙巳改明善書院爲  
學校因校基太窄將父遺倉屋一所計三間兩廂并附  
屋四間概行樂助擴充校基以洪教育其姪翊周成周  
永升永宣等俱熱心公益一致贊成知事錢呈請上峰

獎給有嘉

葉茂財字廣源沿坑嶺頭人性儉樸家僅中貲稍有餘蓄  
輒修道路建橋梁並涼亭三座捐田爲下川莊修路資  
興造祖祠捐田四畝爲享祀費遇鄰里鄉黨有貧困者  
盡量周卹年八十二無疾而終子大斌有父風跋保嬰  
局田租貳擔壹籬壽八十五人咸謂積善之報云

葉必升字杏村楓坪人曾舉爲玉巖區正議長性謙和非  
公不至疎財仗義嘗捐田三畝爲玉巖保嬰經費每逢  
歲歉運米濟民創設小學教育村童獨力修砌龍虎坳  
斗潭黃埠隍淨水嶺一帶要隘山路數千餘丈同德雅

松陽縣志

卷九

人物

尙義

九六

溪和仁各石橋均出鉅貲襄成其事前知事余因貧民  
習藝所常款支絀勸助洋五百元旌以義淑可風順直  
水災慨解仁囊知事錢贈以爲善最樂甌海道尹黃匾  
其堂曰好行其德享壽七十有八子逢蔭有父風今歲  
修志捐洋五十元知事陳以好行義舉額之

張文煜字子明附貢生城西人素性剛直見義勇爲咸豐  
時粵匪入境督率鄉團驅逐賊黨知縣徐葆清保舉以  
訓導用後奉諭勸辦城倉積穀建縣署及儒學正副二  
齋修縣志並籌辦晉豫賑捐事宜無不盡心竭力潘府  
憲紹詒贈以指囷共濟匾額至於經管節孝祠捐修祠

宇整頓祠產且約節孝後裔各助田畝以爲該祠歲修香燈頒胙之費其生平尙義爲此

潘世霖字雨亭布理問銜城南人知縣朱慶鏞興辦城倉積穀霖爲倡首初無子後十五里大路被水冲塌知縣皮樹棠原擬募捐修復霖慨然獨任其事費款二千餘金皮公以人樂康衢額其堂是年生一子僉以爲修德所致云

何家樟上河人國學生自幼讀書爲鄉先輩所器重及長經理族務井井有條培養子姪均臻成立其對於社會爲人排紛解難處事至公並全姪登庸登昌置買良田

松陽縣志

卷九

人物

尙義

九七

爲村中育嬰經費鄉里倚賴壽逾古稀咸稱其齒德可風云

周士登字進階泉莊人急公好義地方公益事莫不量力爲之憤專制政體之不良每歛歔太息勸人求學以救國光緒三十二年特遣胞弟鯤遊學日本其時吳君朝冕朝鼎東遊乏資傾囊助之又獨捐資財於赤岸地方創辦坤元女學校爲一邑倡生平好善類如此卒後朝冕父吳春澤明經爲之傳曰閱世獨具隻眼識英雄於未遇非感恩語蓋紀實云

潘錦江字春帆附貢生城南人生平見義勇爲有膽識有

才畧凡地方公益事獨任仔肩尤慷慨樂善如倡造岡背橋興築塔溪墩收廢字埋野骸砌街道疏衢溝施醫濟困排難解紛都人士咸樂道之其弟錦瀾字子安廩貢生慈祥慷慨和藹性成有難兄難弟之稱

徐建中字以正城東人性剛直氣象雄偉以武舉任楓嶺營仙霞汎千總獲理本營遊擊解組後從事商業經營積貲家遂小康好行善事自光緒二十四年以後捐修申亭朝亭修砌市墘頭一帶街道及源口通衢至於建築橋梁無不捐助壽七十六而終弟建藩字翰臣邑增生生平好名喜清談研究岐黃堪輿之術有得於心人多欽仰之且天性孝友質直好義爲人排難解紛不遺餘力亦一鄉之善士也

徐樹芳字以道號樸齋附貢生城東人品行端方當處困時設熟訓蒙令子習商業子善經營漸致小康名望日隆民國肇興被舉爲商會長生平樂善好施獨修養濟院錢知事勒石以表其德黃道尹亦額於院曰窮黎得所壽八旬夫婦齊眉 大總統錫以匾曰老成典型錫其妻曰鄉里矜式並給內務部證書褒章子儒林字佐治邑庠生民國三年爲城區自治委員歲歉民食維艱習知事籌運甌米以濟民食儒林竭力助之民賴以安

城南大埭洪水沖塌商請知事撥款修復適商會改選會長當選繼父任惜享年不永未竟其業

潘愛桃字種夫邑庠生城南人素性剛直見義勇爲經管范公賓興義田以該田無多同張福隆許士周呈請知縣劉靖將石門圩充公墾田提出三十畝爲劉公賓興義田合爲范劉賓興其餘田十畝零爲該庄橋渡經費刻石立碑俾垂久遠是舉也邑人士咸稱道之民國初曾舉爲城區議員多所建白惜享年不永爲可悲爾何文龍字雲亭附貢生清季興辦學堂抽撥寺田與有力焉旋集同志組設商務分會以勞績遴委理署奉化學

松陽縣志

卷九

人物

尙義

九九

訓導迨國體改革被舉爲縣議會副議長嗣爲縣財政科長革除剝算小民之弊旋舉爲第二屆省議員提議壬子水災案豁免災田糧賦松民受其惠塔溪僅一木橋往來擁擠時多危險慨撥己田計值八百餘金另建一橋以便行人復修築釣魚嶺及各處道路先後費五千金縣知事詳請褒揚奉准給予匾額褒詞可謂富而好禮者矣

何方有支木人性樸訥自幼爲人傭工積銖累黍暮年置田十數畝惟未婚娶捐田三畝入祠餘田十四畝撥入玉巖保嬰局爲設立基礎紳董徐應龍楊光揚葉秀淦

等於光緒年間先後稟請邑令劉公范公立案開辦迄  
今鄉鄰德之春秋祀焉

麻冕字崇禮桐廬人平日好義留心辦學民國初年禁烟  
案內同出毅力由浙江巡按使獎給一等銀質獎章並  
證書縣知事余以熱心教育匾額獎之

蔡毓芳字湘三世居古市人邑庠生智略過人經驗宏富  
賦性鎮定見義勇爲生平如籌辦古市平糶建設觀口  
橋梁辦理團練防務襄辦縣立毓秀私立貫一創辦古  
市初校貞靜女校以及古市鄉教育會商業會農會保  
嬰局等慘澹經營悉心整頓皆井井有條惜天不假以

松陽縣志

卷九

人物

尚義

一百

年未及中壽而卒邑人士咸深悼焉

高良仁永繡曾孫家無恒產自少力農不識一丁惟熱心  
公益積有餘貲卽以修築橋路建設茶亭年七十餘猶  
荷鋤耕作遇有路坍塌輒躬自舁石甃補之以溪港礁石  
觸船每至傷人屢出貲僱匠自松達麗悉鑿平之事聞  
於朝民國八年奉大總統獎以急公好義匾額並給紫  
綬銀章又奉查知事給以功深利濟匾額

賴汝賢東閣隴人創辦本村私立崇正初等小學校首捐  
大洋肆拾元爲開辦費並捐良田拾畝計噪租拾伍擔  
估價捌百元有奇又爲義務校長七年前後熱入校用

洋捌拾元士紳援例詳請民國八年省長齊獎給二等銀色嘉祥章以爲捐資興學者勸

蔡封字周卿城東人邑庠生有膽識遇事善斷葉公昭敦深器重之生平多義舉城南大堞冲塌設法修復張邑侯以急公尙義獎之光復時縣長張銘新辟爲參事繼任劉耀東延爲民政科長尋病卒年未五十不終其才人皆惜之

王起棺鳴贊生玉巖根下人性樸訥好施與勤儉治家仁慈處世壽逾古稀子聖遴善承父志施濟爲懷對於橋梁道路事尤爲注意民國元年秋洪水冲塌大畝莊大

松陽縣志

卷九

人物

尙義

百一

路二百餘丈傾囊獨砌並修黃皮嶺邑令查廉其事以樂善好施額之其餘善行不可枚舉今歲修志復捐銀圓伍拾元爲助知事陳旌其門曰好行義舉

葉文鑑玉巖人幼務農節儉自守寬恕待人子紹芝繼父業漸小康好行善民國戊午倡助鉅貲修造普濟橋並募築同德和義兩石橋又獨力修砌大源大路百餘丈今復慨捐修志經費墨銀伍拾圓邑侯陳旌其廬曰好行義舉

人物志九

隱逸

元

周權字衡之通經史工於詩至京師歐陽元薦與館職以母老辭不受有此山集

葉庸四至元壬午鄉舉義烏黃潛贊曰貌癯而清性栗而凝烈雖未著於大廷功已翊贊夫朱程拜下風而興起仰高山而景行

練魯字希曾至正間父進官京師因徃省以宦籍就試中第元主北去魯方弱冠南還不復語及出處隱居事親

松陽縣志

卷九

人物

隱逸

百一

遭母喪飭粥啜水哀毀逾節比葬廬墓六年明太祖有詔徵辟有司舉魯應聘力辭不已至武林著辭病詩九律聲調悲壯思志哀鬱歸家閉門謝客所著有倥侗集

明

陳德詢號少微山人博通經史雅志高尚獨立不羣識者知其有仙風道氣尤好山水遇佳勝處輒延佇遐想思入風雲題咏務求精絕一時名士多推重焉嘗膺聘不起所著有少微集藏於家蓋少微乃括蒼星次處士淵藪故所號著皆取之焉

包公慶號九芝山人能詩文善書筮見重於世當道每欲

推舉之辭以疾壽七十五終

毛輝字彥明博學雄詞總制孫炎薦署學事屢辟不起嘗曰吾讀書學問自分檢身理家修德承祀以全歸焉竟樹卉種菊策杖獨步入紫青山中卜地爲竈穴名曰全歸窩自呼曰介夫士友以其愛菊類陶皆稱之曰潛齋先生今白龍山下有潛齋書院遺址存焉

包應元字伯仁居蟾湖耽山水之趣尙義好施里人苦渡跋租五十石以濟之時有壙場奉旨封塞頑民遂掠鄉人受害甚眾元慨然赴道府代雪其冤邑人咸相羨曰斯人有義士風臨終戒子曰家無厚儲惟德是賴汝也

松陽縣志

卷九

人物

隱逸

百三

慎之得古君子之遺訓焉

詹希諫號西野有古長者風龐眉鶴髮猶勤學隣休於室輒正辭切責子孫皆穎秀無媿望族之舊壽耄飲於鄉謝一廉號岳陽事親孝少遊庠食餼爲時推重遷學宮獨任經營以數奇淡名心篤嗜丹青嘗入閩閩人得其尺幅無不珍藏晚樂山水所至圖畫記詩以寫曠懷壽七十六

劉明經號紹序少年穎異過人治春秋入郡庠每試輒冠羣英廣延四方名士縣建學宮與葉以章共董其事尙義清高築舍於竹溪以自娛邑令莫不敬重之

周文志號見溪幼習儒艱於數以門戶計爲省掾兢兢守法上官俱霽色與語未嘗獲愆晚年植竹藝花招同志老友優游於風辰月夕有古隱者風

丁松之字長茂性忠厚好善樂施南門外廣濟堂舊址捐資獨創見善樂道備俱謙德壽八十餘

葉春和號南塘性慷慨自喜愛遊古名勝慕吳姑蘇之繁盛挾資遊匝月興盡而返床頭多釀名醞遇良辰無不頽然而止

潘繼成字樂之性孝友醇正復坦率飲酒自娛不問家人生產惟恪守舊業而已教子有方成譽膠庠壽六十餘

松陽縣志

卷九

人物

隱逸

百四

葉希召號梧溪萬厯間貢訓子有則歲首卽令就館肄業至臘始令歸家塵務絕不令經心已則優游泉石隱居自樂焉

劉學成號望峯孝恭性成以卑自牧以厚待人行年七十無一字涉公庭惟義方訓後子若孫皆食餼邑侯舉鄉飲矍鑠之狀人謂仁者果壽云

葉壽山號梅竹少壯食餼事親盡孝好施與中年卽棄名利隱於玉巖環居數十里莫不被其德惠生三子卓有成立

毛度號西坡幼習舉子業先輩期以大受屢遭不偶因而

考槃自樂生平制行誠慤取予不苟教諸子以義方子

孫相繼鬻序壽踰七十屢舉鄉飲

以上舊志

劉公全字雲軒佳溪人少徇齊長折節讀書篤守宋五子學擯所謂帖括者勿寓目性和而介敷門事親泊如也父瑜亭嬰心疾全奉侍惟謹廁牕諸役不假手於人事母亦如之凡事關公益力所能爲必爲之以悅母嘗自樵古孝子像於家廟壁以示後人隱居自樂不干仕進享年七十有七鄉人同聲稱善士所著有老日休示孫帖多樸學語真不愧爲隱君子矣山陰湯壽潛錫以傳曰劉隱君南通張殿撰爲書其事非諛辭也

松陽縣志

卷九 人物

隱逸

百五

蔡克猷字壯哉自號種栽邑庠生城東人天資穎異志氣不凡曾爲教育科長後師事夏靈峰遂謝絕世事隱居散溪躬耕自樂日則盡力畎畝夜則教訓生徒胼胝櫛沐雖烈日寒風不避中年殂喪人輓之曰見可行則行如驟雨狂風猛趨疾進見可止則止卽躬耕樂道抱樸守貞而一種毅力有百折不回之概其養氣也深故其感人也速設教未四載總髮弟子已數十人若天假以年挽狂瀾正人心安知非伊人任乎惜乎其中道而逝也著有散溪遺書讀其書可想見其人焉

人物志十

藝術

毛梓字守庸精醫術受業於彭希武時御史吳叔潤病瘡羣醫環視無措庸往視數劑而愈御史異之程恩與病惡寒欲絕家人已易簣庸往視曰此可起也使掘阱實火設續以卧其上覆重衾用釜煮藥蒸之卽起其奇驗多類此人多以神醫稱之

張夢庚嘗遇異人授易學元末召居將幕推步無毫爽後復懸壺於市賣卜一日有葉某者無子多娶妾庚爲卜語以唐詩二句反其詞曰不是桃花貪結子却教人恨

松陽縣志

卷九

人物

藝術

百六

五更蜂葉歸曰謬哉此老風字尙不識而謂其識理乎未幾其人養蜂數十櫃一旦蜂出冒雨收之蜂忽四集其面螫而死人稱其神

潘國爵號少泉幼業儒數奇不偶有異僧挾針灸神術有賈者久跛僧索一飽齋爲針之跛立起爵異之懇求得授術遂大行往往奇驗遊公卿間俱尊禮之

周漢卿少嗜學博聞通曉百家尤好岐黃術精入元微凡針劑皆立效人以神醫目之或有聞其至者不藥而安醫道大行於兩浙而婺尤著焉宋景濂嘗綴序贈之後遂家於婺

毛登第善醫設藥肆於門以待疾者遠人迎之治藥餌愈而後去長於起斃雖貧不受謝邑令聞而嘉之刺史廉其事給冠帶

葉文獻號近泉少業儒不就改業醫存心仁厚貧者無資不取藥值且復濟之盡心調理卒無倦色

以上舊志年代無考

明

孟繼宗字彥隆明時諸生外孟人卓識博覽好讀異書善劍術精騎射而秉性慈祥絕不露赳赳氣象平濂西枕萬山元末鼎革地經兵燹盡爲榛莽中有大蛇盤踞其間能於百步外噓氣吸人畜負嵎肆食爲一方害宗憂

松陽縣志

卷九

人物

藝術

百七

之一日迅雷奮擊蛇翹首噴霧相薄電霆旋繞不能下宗飛一鏑以飲之弦響羽到雷卽下碎其首害遂除是夜夢神授墨篆一卷告以汝持此救世功行圓滿當躋位大羅忽不見宗自是廣行拯濟及歿人懷其德建豐慶菴祀之凡以疾病或亢暘祈禱無不立應鄉人至今猶嘖稱爲孟太公云

清

吳春翰字沂源號湧如生平以救濟爲心嘗自言曰不爲良相當爲良醫精究內外醫科均極淵通凡有延請無不着手回春光緒間邑令皮匾其門曰岐黃濟世

葉起鴻字秀亭西田人業儒不就改業醫遂精其術醫道  
大行於松遂宣三邑咸以神醫目之宣平知縣汪榮給  
以術繼天士匾額本邑知縣給以和緩同仁匾額子書  
田字心耕承父業辨症詳明處方靈敏知縣趙聯元給  
以匾曰著手成春知事呂耀鈞給以匾曰妙手生春孫  
含輝尤聰穎因家世業醫亦棄儒就醫辨症立方迥異  
庸俗知縣張綱給以匾曰功同良相教諭徐士駢給以  
匾曰秘囊傳家今其曾孫仍習醫學可謂醫世家矣  
劉士濬小槎人邑庠生無志進取好學方技凡醫卜星相  
無不精究尤精外科能鍊丹汞神效卓著壽七十餘

松陽縣志

卷九

人物

藝術

百八

高肯構象溪人邑庠生胸襟灑落寄跡風塵放懷山水後  
於黃山遇道人授以易數之學悉心研求著有卜筮斷  
驗一冊凡人事吉凶天時水旱無不應驗惜未及付梓  
而燬於兵燹術竟不傳

高作謨邑庠生少孤祖永繡撫之成立教之學醫得乃祖  
心傳其術甚精祖歿季叔尙幼竭力提携人咸欽其孝  
義子紹芬郡庠生世承家學亦精醫埋一生至誠取舍  
不苟壽至八旬無病而終從叔煥然輓之曰一生本至  
誠如侄之行足千古八旬稱上壽吾祖以後第二人  
溫玉泉字積厚橫溪人精醫術治傷寒一症尤稱妙手聲

名播於松遂兩邑光緒戊子春訓導徐士駢有子疾篤眾醫罔效延玉泉醫治數劑而愈以慧心仁術額其廬張麟書號鏡齋歲貢生平卿人博學多能專精醫術名噪一時凡有痼疾一經療治無不立愈有童子手足病瘋痺寸步不能移爲立一方囑以百劑已服五十劑病者請改方張曰定須百劑後如命而服遂愈著有經驗醫方行世壽逾古稀人皆稱爲明醫

詹兆霖字沛如古市人邑庠生賦性聰敏喜學醫業甚精行醫數十載活人無算壽近八旬迄今里人咸以扁鵲稱之

松陽縣志

卷九

人物

藝術

百九

周遠普字春暉號友圃高亭人精醫理踵門求治者庭若市家小康不索謝活人無算有某氏婦年方花信偶過其門周熟視之慨然歎曰是婦逾月必病病必死惜乎死像俱現已非藥石所能救矣後果病而死周有幼孫甫七齡感冒寒疾執其手驚曰是兒肺絕無方可施未及三日果殤生平治病經驗如神姑舉二事以例之季志友字有文神壇人歲貢生賦性沖挹博覽羣書淡進取專研醫學診治沈疴活人無算古云一昧三折肱庶乎近之年六十有三而卒

人物志十一

流寓

唐

葉儉字靜能會稽人遍遊天下名山勝地至松陽登卯山  
卽大喜遂卜居焉其孫法善以道術鳴世封越國公元  
宗撰步虛詞以送之至懿宗亦製文以贈之後子孫多  
居其下

宋

沈晦字元用宣和六年廷對第一建炎三年出守處州愛  
松陽山水之勝因家焉凡歷守十九郡官至大中大夫

松陽縣志

卷九

人物

流寓

百十

直徽猷閣給事中所居之巷曰襲魁坊尙存有宣和御  
製賜宴詩碑刻於學所有遊詠山水詩文多載藝文  
董琇字星如楊州興化人博雅醇厚業儒數竒由貢監爲  
麗水二尹尋以庶母憂去後遂不仕得異人眼科術救  
人甚多樂松陽有仙隱風遂卜居山中

劉一先汴梁人由武進士任鎮國上將軍從宋高宗南渡  
徙居舊市至今子孫蕃昌

以上  
舊志

清

鄒文運字琨山閩人光緒間由把總任松陽駐防調任湖  
州景甯駐防愛松陽民情敦厚風俗醇樸卜居城北仁

壽里其子鼎字璧如省立師範畢業生歷任灃嶺分水  
浦嶺頭東臬印渚埠澤國穗豐王村等鎮警佐陞任淳  
安縣警佐民國年間由城北遷居南鄉大竹溪

段如海不知何許人光緒十一年春敝衣敗履足若跛執  
缶作硯鬻畫古市適書院月課卷發出衆方取閱段斲  
斲而前微睨之似不滿意衆問曰汝亦知文耶答曰頗  
能之衆不信請卽命題衆以四書題文恐易襲取特以  
舊市二字爲題段援筆立就洋洋灑灑俊麗風華衆駭  
絕知爲名士詢其姓名家世自言姓段名如海餘不吐  
實衆留教讀師事之後游卯山訪楊鶚薦不遇卽題五

松陽縣志

卷九

人物

流寓

百十一

律一首於院壁音節絕佳居古市年餘所作詩文甚夥

後一去杳無踪緒

詩載  
藝文

張有光字贊湯號濟川江西人光緒間幕遊甌江返棹過  
松行李被竊艱於資斧不得歸遂家焉素習堪輿由是  
益加研究於卦例玄空之術極造其巔眼法最高聲價  
甚重往來浙閩龍浦間尤著名人皆稱爲地仙

人物志十二

方外

秦

戴火僊秦漢以前入留名山修煉道成陽精畢露於頂故以戴火名在山隱見不時每晚或懸於山鄉人皆知其爲戴火僊日則見人而不見火夜則見火而不見人至唐時邑人毛雲龍者好修嘗創祠候戴火僊於留名山三年無所遇忽一日見二人奕於石雲龍在傍觀奕局未終覺苔侵於石上弈者曰子可以歸矣雲龍頓首而還祠人曰子何之今三年矣及再至其所不可得雲龍

松陽縣志

卷九

人物

方外

百十一

唐  
修煉於留名山其火如舊風月夜則仙樂發於山中若八音具奏徹曉乃已或異香過鼻則火懸眾莫知其故

葉法善字道元祖儉避地於松陽卯西山間母劉氏夢流星入口吞之而娠及產神光滿室異香彩雲繚繞於庭七歲涉江三年不返還問其故則曰二青童引我飲雲漿故留連焉長而修煉神丹元通廣大飛騰幻化無所不至元宗聞之召入便殿不以臣禮待之詔入後宮觀燈法善曰西涼府今夕之燈尤盛帝曰欲往觀得乎法善曰此易耳請帝瞑目騰祛而上卽至以所隨如意貰

酒復請瞑目已還殿中遣使於涼州取如意以驗之八月望夜與帝遊月宮因聆天樂問其名曰紫雲帝更之曰霓裳羽衣自月還過潞州俯視城郭峭然月色如晝請帝以玉笛奏曲遂投錢於城中旬日潞州奏八月之望有天樂臨城兼獲金錢以進帝累與近臣試其道術皆非妄幻若夫凌雲化鶴追岳神致風雲靈驗之事不可殫述後法善與其祖求墓志於郡守李邕但許其文不許其書竟追其魂書而刻之續以聞邕邕曰初以爲夢今果然矣至今莫不異之開元八年庚申法善年已一百七歲忽見天樂彩雲上覆法善化劍而去

松陽縣志

卷九

人物

方外

百十三

葉藏質法善裔孫也唐懿宗時人累召不起終得其祖之術解化而去

宋

劉應真字從道少有逸氣長禮吳若容爲師壯受籙於龍虎山張虛白傳法於汪惟德元祐間召至京師主上清儲祥宮賜紫衣號靈寶虛應師有道德經解意行世徐泰定字虛寂紫虛觀道士宋尚書梁汝嘉墓在松陽萬山間有觀行庵開禧初泰定居之一日有吹雙笛道人至庵與泰定語相合授以丹訣仍贈筆一枝令作水墨山水泰定謝不能道士曰但隨意爲之遂畫如素習後

十年道人欲挾之遠遊泰定辭乃留詩別去鐵笛雙吹  
破曉烟相逢又是十年前曾將物外無窮意總付毫端  
不盡傳白髮數莖君老矣青雲一朵我飄然世間究竟  
只如此何似同歸洞府天泰定年八十餘常童顏端坐  
而逝吹笛道人自稱李同名疑呂洞賓

祖謙禪師居邑之西屏山嘗遊京師與學士蘇東坡友善  
東坡遺之詩曰道人曉出西屏山來施點茶三昧手忽  
驚午盞兔毫班打作春甕鵝兒酒天台乳花世不見玉  
川風液今何有東坡有意續茶經要使祖謙名不朽

雪堂和尚葉姓曾叅指源佛眼二師乃大悟遂遍歷名山

松陽縣志

卷九

人物

方外

百十四

士大夫多禮待之

道行姓葉氏衢州守仲謀之子弱冠侍父宰盱眙因禮普  
照王塔遂剃髮受具父母不能奪其志游方叅指源潤  
佛眼二禪師乃大悟徑山大慧禪師寄偈褒之紹興二  
十一年示疾歸寂初師之學於佛眼也習禪癡坐至於  
塵沬顏面蝨泐衣領皆不之顧佛眼一日饌寶令師通  
殷勤移時不至使人往趨之見師於空室面壁屹立不  
動其爲學勤苦如此宣和間父守衢州師往省至州不  
去包錫直入郡治閻人拒之師遺以金乃得入至重門  
又拒之復遺以金及堂見母母持之而泣二閻始叩首

請罪還所遺師曰他人物非我有也其待人以恕如此師晚年居善因寺將終老焉州太守屈主治平寺師勉強而出踰年遷主法海寺適債卒猖獗人皆奔竄師巖然不動舒徐自若其善於處變又如此師之平生行業卓卓可觀名不虛得信哉

守常自號翠峯少祝髮於里之覺宗寺於書不甚通解同衣晒之守常以爲耻遂發憤遊方與眾誓曰學不得道不復還鄉於是遍走名山叅訪禪宗得悟作偈頌深造理窟一日端坐而化

元

豐去奢元人也居卯山修煉山之東有巨石忽神人語曰此下有劍丹乃昔人所藏者子盍取之去奢謝曰賦性荒謬豈敢妄求後三年忽風雨石起劍丹出焉時麗水人葉造擁眾自立爲牧索去奢劍丹更囚之密室數月不與飲食及開室如故異之送回一夜風雨劍丹復歸石下去奢仍居山十年忽辭謝鄉人跨白鶴而去

趙賣雷者元時人稱初陽真人爲宋宗室母孕時有神人言曰是兒有異於常事聞於外元人捕之急真人方八歲流落八三茅山茅君教以度世術至十三歸懸脾於衣帶上書蓄賣風雷人異之初茅君之別也謂真人乏

食許其賣雷自度每令小兒伸手書一雷字於掌擦之熱捻之開卽競然震天兼辟邪由是人爭買之松旱縣請禱真人應聘至壇請官民迎雨時天日炎赫衆以爲難真人以墨汁咒符火之黑雲蔽天大雨如澍真人年將踰百忽至白龍山頂祭太乙夜半飛昇而去

明

潘自然明初人爲逍遙觀道士善符咒燒煉之術能號召風雷居雲巖山中每夜有神燈張掛於門出而無踪歲旱求自然禱然請衆各備雨具行眾晒之至期果大雨又云三日登壇三日雨一聲號令一聲雷

以上舊志

松陽縣志

卷九

人物

方外

百十六

高聰字慧通象川人性愛靜修嘗入雙薦峰結庵修道能號召風雷驅使妖魅相傳下山乞火遇佃人戲以草履化雙魚並繫留日光給佃人輟耕捕之旋釋日取履而行已昏黑不及歸矣後人於峰下立祠祀之迄今禱雨輒應石洞中尚有劍角遺蹟在焉

清

孫李樑自號理良黃嶺頭人母姓李從母姓也幼事母孝長務農業初習拳棒膂力過人頗逞強後乃覺悟遂棄家茹素僑居麗水大港頭土地廟終年肩挑敝簾以收拾字紙爲事逢人勸善不少懈嘗與高進士談性理多

切中語雲遊麗雲松遂間後不知其所之

黃鳳鳴不知何許人光緒間由遂來松寓居於象溪慈恩寺朝夕誦經日出收拾字紙凡所募化悉爲設天燈造紙爐平治道塗之用暇則宣講因果勸人爲善孳孳不倦民國元年七月大水寺宇漂沒夜半飛升村人聞空中呼曰我到遂昌倉頡廟做土地矣請謝諸君

僧崇儒自號貫一和尚主持古市永甯觀廣因寺靜修參乘深悟禪機謹守偈戒不染塵氛高進士嘗以靜叅二字額其堂光緒季年慨撥寺田八十餘畝值金三千八百有奇勸辦古市貫一高等小學校嘉惠士林旋奉

松陽縣志

卷九

人物

方外

百十七

大總統徐獎給敬教勸學匾額年逾古稀無疾坐化方  
內外交口稱之

